

**ASO LULU, 26 MATI 2014**

*Na nofoia le Nofoa e le Fofoga Fetalai i le itula e 9.05 i le taeao.*

**Tatalo.**

**FOFOGA FETALAI:** Tatou te taufai lagona faatasi le agaga o le faamanu i le tatou Taulaga na siitia i le Atua i lenei taeao ona o lea e matau atu sulu o le tino ua atoa tagi le paia o lo tatou Maota i ona tulaga faalupe e masani ai, aua le amataina ma le tauavameaina o a tatou galuega i lenei aso fou. E momoli atu le faafetai tele i le onosai mai o lo tatou Maota, ua malo le usufono. Sa tatou taumavae i le aso ananafi, o nei mea uma tatou te le iloa po o fea o taatia ai galuega a le alii o le lalolagi, ae faafetai i le Atua ma faafoi Lona Viiga ona ua matau atu e le o afe se atua o le ala i lo outou mamalu. O le agaga faafetai ona o lea ua toe matau atu ua tatou toe faatasi ma nisi o sui usufono sa tatou le faatasi ona o le le atoatoa o le malosi, a o lea ua matau atu o lea ua taulu, taulu, taulu talosaga a le Maota, o lea ua tatou toe futialo faatasi i lenei taeao. E momoli atu le agaga faafetai tele i le paia ma le mamalu o lo tatou Maota. E manatu ua maea ona folasia i malae le manulauti ma lo tatou faamoemoe i le tulituliaupuina o a tatou galuega seia maea. O lea ua tatou tulalata foi i le afa ma le faaiuga o lenei vaiaso, e manatu e naunau ina ia uma ane le tatou polokalame ua tele se tatou galuega ua uma ona faatino. Ia alo maia, e talitonu le faamoemoe o le a tatou alo i a tatou galuega ma e i ai le talitonuga ua outou lava taoso ma outou lava tapena i lenei taeao mo a tatou polokalame.

E momoli atu foi le agaga o le faafetai i le tapuaiga a Samoa. E talitonu le faamoemoe ua logo faa-Tutuila le tapuai mai a lo tatou atunu a o tatou alofaiva. Ua faafetai Samoa i la outou tapuaiga, e talitonu le faamoemoe e manuia le alofaiva a lau Palestene ona o la outou tatalo. Le Aufaigaluega Paia a le Atua, ia utupupuina pea fulu o le segaula aua la outou fatuaiga tausi aua le tausiga o agaga aemaise o le tatalo le leoa ina ia manuia Samoa ma ona upufai aemaise lona atinæ.

#### **ILOILOGA O LIPOTI A KOMITI FILIFILIA**

**P.P.2013/2014 NU.43, LIPOTI A LE KOMITI O TUPE MAUA MA  
TUPE TOTOGI I LE P.P.2012/2013 NU.18, LIPOTI FAALETAUSAGA  
A LE FAALAPOTOPOTOGA MO TAUI O FAALAVELAVE  
FAAFUASEI MO LE TAUSAGA FAALETUPE 2011 - ILOILOGA**

**FOFOGA FETALAI:** E tolopo Galuega a le Fono Aoao i le aso fono ananafi ua maea ona tali le Afioga i le Taitaifono i mataupu sa laga e sui usufono.

**26 MATI 2014**

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Illoiloga**

**O lea o le a tuuina atu loa le Fesili.**

***Na faamaonia le Lipoti.***

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**P.P.2013/2014 NU.57, LIPOTI A LE KOMITI O GALUEGA,  
FELAUAIIGA MA SIOSIOMAGA I LE P.P.2011/2012 NU.60,  
FAAMATALAGA O SINI AUTU A LE FAALAPOTOPOTOGA O  
MALOSI FAA-ELETISE MO LE VAITAIMI 2012-2014 &  
P.P.2011/2012 NU.92, LIPOTI FAALETAUSAGA A LE  
FAALAPOTOPOTOGA A LE MALOSI FAA-ELETISE MO LE  
TAUSAGA 2010/2011 - ILOILOGA**

**Tofa TUSA MISI TUPUOLA** (Taitaifono, Komiti o Galuega, Felauaiga ma Siosiomaga): Lau Afioga i le Fofoga Fetalai ma le mamalu maualuga o le fonousu a le atunu. E au faatasi ma lau Afioga i le Fofoga Fetalai i lenei taeao i le viiga ma le faafetai e pei ona maea ona siitia aua ni faamanuiaga mai le lagi aua lenei aso ma ana fonotaga. Malo faafetai tele i le soifua maua ma le soifua lelei ua mafai ai ona toe feiloai le Palemene i lenei taeao fou.

**Ua ou tulai atu ma le agaga faaaloalo ou te faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana SAILILIGA, FAUTUAGA MA IUGAFONO.***

***Faaluaina e le sui usufono mo Palauli, se tasi o sui usufono mo le Au Palota Taitoatasi, Afioga Maualaivao Pat Ah Him, le sui usufono mo Falelatai ma Samatau, se tasi o sui usufono mo Vaimauga Sisifo, Tofa Lenatai Victor Faafoi Tamapua ma le sui usufono mo Sagaga le Falefa.***

**FOFOGA FETALAI:** Tulai mai lau Afioga i le Taitaifono e saunoa.

**Tofa TUSA MISI TUPUOLA:** O fautuaga lau Afioga i le Fofoga Fetalai.

**“FAUTUAGA:**

**I le maea o ana Illoiloga, e fautuaina e le Komiti le Malo ina ia:**

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

1. Lagolago malosi le Poloketi o lo o faatino e le Faalapotopotoga mo se eletise gafataulimaina mo le atunu, e pei o le:
  - Malosiaga e maua mai le La;
  - Malosiaga o le Savili;
  - Eletise e maua mai le:- (suauu popo);  
(patiki);  
(ma isi laau).
  - Isi nofoaga fou o lo o maua ai le suavai.
2. Ave le faamuamua a le Faalapotopotoga mo le faaleleia o vaega o le auaunaga o lo o tulai mai ai le faafitali o le eletise maimau e pei o le faaletonu i laina eletise ma le faafitali i mita eletise ma mita eletise totogi muamua, ina ia oo atu i le isi lua tausaga o lumanai ua i ai se faaitiitiga o le eletise maimau.
3. Uunaia le faamalosia o Polokalame faalauiroa a le Faalapotopotoga i le Televisi ma le Leitio mo le silafia e le atunu o mafuaaga o le motusia faafuasei o le eletise i le tele o taimi, ina ia faaitiitua ai faitioga a le atunu i le motusia so o o le eletise e aunoa ma ni faasilasilaga mo lo latou silafia.
4. Tausisia pea le Faaiuga a le Kabeneta lea ua faamutaina ai le toe tuuina atu o ni iunite tau eletise mo le faaaogaina e le Komiti Faatino ma Sui o le Pulega, e aunoa ma se tupe totogi.
5. Faaauau pea galuega mo le faapipiina o mita eletise totogi muamua ma ia mautinoa le lelei atoatoa o ia masini. Fautuaina foi le silasila o le Faalapotopotoga i nisi ituaiga masini (mita eletise totogi muamua) e sui ai le ituaiga masini o lo o i ai nei, ona e vave leaga ina ia foia ai le faafitali o le maimau o le eletise ma faaitiitua ai foi vaegatupe faaalu i galuega mo le fuaina o mita ma taavale o lo o faaaogaina ai.
6. Faaleleia afi eletise suaau tuai o lo o i ai nei i Savaii i ni afi eletise fou, ina ia foia ai le faafitali o le faaaauau pea o le motusia o le eletise aemaise lava i le vaitau o aso fiafia i le faaiuga o tausaga taitasi.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

7. Vave faapipii se masini fou (new voltage regulator) i le pou moli o lo o tu lata ane i le pamuvai fou i Falealupo, e faatonutonu ai le fesuisuia'i o le malosi o le eletise e faaaoga e lea pamuvai. O le vave faapipii o lea masini o le a mafai ai ona faasaoina mai lea aseta taugata a le Malo mai le faaleagaina ona o le fesuisuia'i o le malosi o le eletise ma mafai ai ona ausia faamoemoega lelei na fausia ai.
8. Galulue faapaaga le faalapotopotoga ma le Matagaluega o Punaoa Faalenatura ma le Siosiomaga mo punavai ma vaitafe o lo o tamaoaiga ai le suavai, e talafeagai mo le gaosia o le eletise.

#### IUGAFONO:

**I le maea o iloiloga a le Komiti na faaiugafonoina ai e fautuaina le Fono Aoao,**

Ina ia faamaonia le P.P.2011/2012 Nu.60, Faamatalaga o Sini Autu a le Faalapotopotoga o le Malosi Faa-Eletise mo le Vaitaimi 2012-2014 ma le P.P.2011/2012 Nu.92, Lipoti Faaleausaga a le Faalapotopotoga o le Malosi Faa-Eletise mo le Tausaga Faaletuple na faaiuina aso 30 Iuni 2011.”

**FOFOGA FETALAI:** Malo faafetai saunoa i lau Afioga i le Taitaifono mo le tolaulauina o a outou Sailiiliga, Fautuaga ma Iugafono.

Ua tatala atu le avanoa i le Maota mo felafolafoaiga. Tulai mai le sui usufono mo Faleata Sisifo.

**Tofa LEALALEPULE RIMONI AIAFI:** Faafaetai i lau Afioga i le Fofoga Fetalai mo le avanoa. E faatalofa atu i le paia o le Palemene o Samoa aemaise le faafofoga tapuai mai a lo tatou atunuu. Ua malo le galulue i lenei aso, ae e fia fai sina manatu puupuu i le Lipoti.

Muamua, e momoli le faafetai i le Faalapotopotoga ona o a latou Lipoti Faaleausaga ia e matauina pea o lo o sologa lelei le faatinoina ma le tuuina mai i le Palemene. E le faigofie le galuega a le EPC aua o aso uma tatou te matauina, e faigofie ona matauina e le atunuu le lelei ma le faaletonu ona o aso uma, aso uma lava tatou te faaaogaina ai lenei auaunaga. O le ala foi lea a i ai se faaletonu e aafia uma lava le toatele o le atunuu. Afai foi la ua i ai se fuafuaga e sii le tau o le eletise, e aafia uma ai foi le atunuu aemaise le tau o le soifuaga.

P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga

O le vaega muamua lau Afioga i le Fofoga Fatalai lea e tauologologo atu pea e lenei Vaega Faaupufai, o le mea lea o le cash power. E moni le Faalapotopotoga ua ave i tua le auaunaga lenei i faleoloa ma isi vaega e faatinoina, ae ou te molimau atu, o auaunaga nei e leai se auaunaga e 24 itula ma e leai foi se mea e tau o le leai o se galoa aua e i ai lava taimi e galonimo ai i le tagata le leai o sana paoa, ae oso mai ua leai se mea e tua i ai.

O le auaunaga lenei e pei ona talanoa atu e 24 itula e moomia ai lau eletise i lou maota ma lou fale i aso uma, aso uma lava. O le fautuaga e tatau ona toe tagai le Faalapotopotoga ia toe fai se auaunaga faapenei e 24 itula e le gata o le taulaga, o Vaitele a o nofoaga o lo o tele le mamalu o le atunu o lo o afifio ma alaala ai.

O le Aso Lulu lea na tea nei a o usuia le fono na valaau mai ai le tagata i lalo o le NPF ou te alu atu se i ou tilotilo i le mea la e tupu ai. Na pei o le sisigafu'a le toatele o tagata o lo o laina ai i le fia maua o se paoa aua ona pau lea o le nofoaga na maua i lea itula o le po. Lau Afioga i le Minisita ma le Faalapotopotoga, afai o lea e faamuamua o tatou tagata mo auaunaga faapenei, e tatau ona toe tagai i le faatinoina lelei o lea auaunaga. O lea foi tatou te taumafai e uunai le atunu e faaaoga le cash power. Afai la e o le atunu e faaaoga le cash power ae le mafai ona outou faamalieina e tusa o a outou auaunaga, o se tulaga lea e le talafeagai tele.

E momoli lau faafetai i le mamalu o le Faalapotopotoga aua o lea ua matou vaai atu o lea ua tagai i le tele o le vaega lea e faaaogaina le cash power lea e mafua ai le tele o tupe gau a le Faalapotopotoga, ona o le eletise e ave faagaoi. O se galuega ua leva ona tatau ona faatino aua o lena e aumai i fautuaga a le Komiti, e le gata ina tele tagata o lo o mumu fua i nisi o vaega, ae tele le faaletonu i mita ia na aumai muamua po o cash power. E tatau ona toe tagai lelei i ai ina ia faaleleia lea vaega ina ia taofiofia tupe maumau aemaise o le afaina o le atunu atoa i le siitia o le eletise, ona o le le maua mai o tupe ia lea e maumau ma ave faagaoi faapenei.

Faafetai i le Faalapotopotoga ona o lea ua maua atu ua tele ina totogi mita a isi foi afioaga ia sa momu fua. O se galuega tele lea galuega ma e ao ona ave le faamalo i le Faalapotopotoga i le taumafaiga o lea mea aua e le faigofie ma e le lelei le momu fua o isi, ae totogi pili a isi i se faiga faasolitulafono ma e le manuia, ae faafetai o lea ua mafai ona faatinoina lea galuega.

O le matau atu i ai ua tele ina lelei le eletise ona ua seasea toe motusia e pei o le mea sa i ai ona o galuega ia ua faatinoina ma e le faigofie. O le mea e popole ai o le siitia lea o le tau o le eletise lea e foufou mai.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

E pei lava ona ou taua ai i le amataga, o le taimi lava e siitia ai le tau o le eletise e sii ai le tau o le soifuaga ona e link mea ia e lua. E fesoootai lelei mea ia e lua ma o taimi uma lava e sii ai le eletise e faapena foi le tau o le soifuaga. Se i tagai le Malo ona o lea ua maua o le faiga o le nonogatupe foi lea mai le ADB lea na faatino ai galuega ia lea e aumai ai ma aiaiga ia faapenei ina ia sii le tariff pe sii le tau o le eletise ina ia mafai ona toe totogi atu lenei aitalafu.

O mea nei, o mea lava e mafai ona fetuunai e le Malo i lou talitonuga. E mafai ona faatalatalanoa i le va o Malo ma Faletupe nei o Atinae a Asia, o lea foi e fai ma aumai ai a tatou tupe nei e grant mai. Pe le mafai ona faatalatalanoa i se vaega ina ia fetuunai le totogiina o lenei aitalafu, pe tuu loa i le Malo ia e nonofo latou e totogi ae togitogi auauai ae sei tau faamama le tau o le eletise, e le gata mo i tatou, ae o le aufaipisinisi. O le toatele o le aufaipisinisi o le a matua tele le afaina pe afai ae faaauau le siitaga fou lea e i ai nei a le Malo, ma sei fai alofa i le tatou atunu ma o tatou tagata, i le tulaga o i ai. E faafetai e le faapea o lea ua faamalieina i tatou i le tele o galuega lelei o lo o faatino pea ma faaauau pea e le faapea e le o faatinoina. E le o manao foi matou e fai fua pei o le mea o lo o tuuaiina ai matou e faapea e fai fua fai fua. Leai o le matou Vaega, e le o le fai fua, o le fai fuafua tatau ina ia fesoasoani i le tau o le soifuaga i lenei vaitau, aemaise o le eletise.

Ia, e toe faaopoopo atu ai lau Afioga i le Minisita i tatou moli ia i le taulaga lea pei ona taua ananafi, sei vaai tonu po o ai tonu e nafa ma lea vaega, aua o lea ua fetuunai solo, ae afai o lau Matagaluega, ia sei alolofa ane sei vaai ifo i lea vaega. Ma le faaaloalo lava. Faafetai.

**FOFOGA FETALAI:** Malo saunoa i lau Afioga i le sui usufono mamalu mo Faleata Sisifo.

Ia ou te manatu ona pau lea... Ia, sei lafo atu i lea Itu o le Maota i lau Afioga i le Tuiatua Faanotonono, le sui usufono mo Aleipata Itupa i Lalo e tulai mai.

**Afioga TAFUA MALUELUE TAFUA (Aleipata Itupa i Lalo):** Faafetai lava i lau Afioga i le Fofoga Fetalai. E faatalofa atu i lenei taeao fou faapea foi le Afioga i le Sui Palemia ma le mamalu o le Kabeneta ma le paia o sui usufono, e faapea foi i le la Itu o le Maota i le afio o le Taitai o le Itu Agai ma le Vaega o lo o Agaia le tatou Malo, e faapea foi ona faatalofa atu i le paia ma le mamalu o sasao nei i le Maota Fono.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

Lau Afioga na o le lua lava nai mataupu e laga i le Lipoti e fia avatu i ai ni manatu. Masalo ua lua nei vайaso talu ai sa ou oo ai i le Faalapotopotoga o le Malosiaga Faa-Eletise i le fale foi lea o le Tupua Tamasese, sa ou alu e ave se tasi o tagata o lou itumalo ua motu lona moli, vaeatu le paia o le Maota. Sa ma talatalanoa ma se tasi o tagata faigaluega, o lana faamatalaga, e lilo i lou manatu o le tagata lea na ma o atu o lou itumalo sa tipi le moli ona ua faagaoi le faiga o le eletise, na maua la ai o ni spot checks a le Matagaluega o lo o fai. O le faamatalaga a le tamaitai o lo o galue ai e faapea o le tagata faigaluega e faapea o lenei mataupu i le faagaoi o le eletise, e pei o le sasao o le afi le matautia o le sosolo la e i ai nei i le atunuu. Ona ou fesili lea i ai, ae o lana tala e ova i le 200 aiga o lo o faatalitali o latou iuga ma o la e faasala e \$1,000 e totogi. Silasila lau Afioga ma le mamalu o le Maota afai o le tulaga lea o lea e i ai le ave faagaoi e le toatele o nisi o le mamalu o le atunuu o le eletise, e ova i le \$200,000 le tupe a le Matagaluega e le o maua mai. A o le faamatalaga na aumai, na o sina vaega, na o le taetae o le pito o le iceberg, lona uiga e lei taitai o la e tele tagata o la e i ai i le vaega lea.

Sa ou fesiligia foi i le vайaso ua tuanai le tulaga pe i ai se fuafuaga a le Matagaluega o lo o fai mo tagata famoli lea e faia lea vaega sese o le o e faapipii le eltise, aua a o atu i aiga e vaivai le tamaoaiga, ae alu atu le famoli lea faataitai, ofo i ai e aumai na o se \$100 ae o le a ou sosooina le uaea e sau mai le poumoli e sau i lou Maota ae lei oso i totolu o le mita lea po o le cashpower. O lona uiga e leai se eletise e totogiina i le Malo. O tagata la nei e tatau ona sailili ia matua aumai e molia ma fai i ai se faatatau. E pei o le vaega lea o lea e fesiligia ai le Matagaluega, ia alofagia le tulaga lea, masalo o le matua tele o le tupe lea e leiloa a le Matagaluega i le vaega lea o le ave faagaoi o le eletise.

O lona lua lau Afioga i le Fofoga Fetalai, ua maua sia avanoa e uunai atu ail au mataupu lea ua leva ona ou talanoa i ai. Talu lava ona uma le Tsunami i tua i le matou nuu, e le o ola lava street lights i le aai. E talosaga atu ai ua faalua ona ou tusi atu i le Pule Sili o le Faalapotopotoga, e oo mai lava i le aso e leai se mea. Na toe pauu nei i le Evan, o nai moli na totoe ai ua o atu le aufaigaluega talai mai e oo mai lava i le aso e leai se mea o toe faaolaina. Faamolemole o lea ua ou laga i le Fono ona ua ou fiu e tusi atu, ua ou fiu foi e logo le Mataglauega, e leai se mea o fai i ai. Ua matua pogisa lava le isi vaega atoa o le nuu pe a oo i le po. Ma le faaaloalo lava. Ia tautuana ane sei fai lea matafaioi faamolemole.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

**FOFOGA FETALAI:** Malo faafetai i lau Afioga i le sui usufono mamalu. O le a avatu muamua le avanoa i le Sui Fofoga Fatalai ona avatu ai lea o le avanoa i se tasi o sui usufono mo le Au Palota Taitoatasi, Afioga Maualaivao Pat Ah Him.

Tulai mai lau Afioga i le Sui Fofoga Fatalai.

**Tofa AGAFILI PATISELA ETEUATI TOLOVAA (Sui Fofoga Fatalai, Palauli Sisifo):** Faafetai mo le avanoa i lau Afioga i le Fofoga Fatalai. E avatu foi lenei avanoa e molimoli atu ai alofaaga mo lenei taeao i lau Afioga faapea foi le Aiga Minisita i le Kapaneta ma le tatou Maota nei.

E tasi lava se mataupu ou te fia fesili ai, ona ua silafia uma lava e le Maota lenei, o le faatinoina mulimuli lava o le galuega lenei o le faapipiina o mita, e fai e le EPC. O le siakiina foi o fale po ua saogalemu mai le eletise, o le aufaigaluega a le EPC. O lea la ou te fia malamalama, o fea tonu lava le taimi lea e faagaoi ai le faiga o le galuega lea? Aua e siaki le fale ua saogalemu, o atu le EPC e faapipii le mita ona faafesootai lea o le laina lea e sau mai le pou ma le cashpower meter. O fea la le taimi lea e faagaoi ai le galuega lea? Ma le faaaloalo.

**FOFOGA FETALAI:** Malo faafetai. Tulai mai se tasi o sui usufono mo le Au Palota Taitoatasi, Afioga Maualaivao Pat Ah Him.

**Afioga MAUALAIVAO PAT AH HIM (Palota Taitoatasi):** Faamalo faafetai i lau Afioga i le Fofoga Fatalai, faamalo foi i sui usufono mamalu o le Palemene ua afifio i lenei taeao. Malo le soifua ma le lagimama. Ou te tulai atu ma le faaaloalo e tasi lava si mea ou te fia talosagaina. Ae lei avatua le manatu lea ma le fautuaga, e momoli atu lau faafetai i le Komiti, ua ou faalogologo ma le totoa i mataupu ma fautuaga a le Taitaifono o le Komiti lea e uiga i le Faalapotopotoga, ua talia ma le fiafia, ua lagona ua leotele le faaleleia o le auauanaga pe a faapea e faatino uma fautuaga nei.

A o lau fautuaga e tasi, o le mea lava lenei o le cashpower. E i ai nisi sui usufono ua saunoa e le 24 itula o le cashpower, e moni. O Vaitele o lo o 24 itula i lau iloa i ai, ae o le taulaga i Apia, na o se fautuaga i lau Afioga i le Minisita e ala atu i le Nofoa pe le mafai, e i ai le tamai fale lea e i tafatafa o le NPF, e manaia aua e tu ogatotonu, e faalelelei le mea e paka ai taavale. E i ai taimi e ono lavevea ai ni taavale i ina pe a oo ina lolofi atu tagata e faatau le cashpower.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

A o le mea e lagona ai foi le fia avatu o se fautuaga i lau Afioga i le Fofoga Fetalai agai atu i le Minisita, pe mafai ona faa-24 itula le auaunaga lea. E pei ona e taua le toatele o tagata o lo o alaala i le talafatai o Apia, aemaise ai pisinisi ma e o lo o i le lio lea.

O le agaga faaaloalo lea e avatu ai se talosaga i lau Afioga i le Minisita, pe le mafai ona faa-24 itula Apia. E leai se mea o i i ai i faleoloa o lo o latou faatauina atu le cashpower i taimi faigaluega, a o le po atoa, pe tasi lava se nofoaga e mafai ona faa-24 itula ina ia faaleleia ai le auaunaga lea. Ma le faaaloalo i lau Afioga i le Fofoga Fetalai.

**FOFOGA FETALAI:** Malo faafetai saunoa. Ia, tulai maia le sui usufono mo Falelatai ma Samatau ona sosoo ai lea ma se tasi o sui usufono mo Aana Alofi Nu, Afioga Hon Toleafoa Apulu Faafisi.

**Afioga TAEFU LEMI (Falelatai ma Samatau):** Faafetai mo le avanoa i lau Afioga i le Fofoga Fetalai, e faatalofa atu foi i le paia o le Maota, aemaise foi o le faafogagaaga a Samoa. E lua lava mea lau Afioga i le Fofoga Fetalai o lo o fai pea ma faafitauli talu ona fai le tatou cashpower. O le faafitauli lea ua saunoa i ai nisi o sui usufono, ma le faafitauli lona lua, o le le o i tua o le aufaigaluega a le EPC e fua maim ita leaga o lea ua sui le faiga, ma silafia ai ua momotu le tamai uaea foi lea, le security lea e sefe ai le mita, ma iloa ai e le o faagaoi pe faasolitulafono foi le ola a le mita a lea aiga ma lea aiga. O nai vaega la ia e lua, aua e taua lava le o i tua o le aufaigaluega ma o atu siaki le mita, read mai le faitauga o le mita ma fua i ai le pili a aiga, ma fai ai foi le siaki faaaauau lea i le taimi e fua ai le mita. E pei o nai vaega na e lelei ona toe silasila i ai.

Lau Afioga i le Fofoga Fetalai, e leai se isi na taua le vaega lea, ae ua ou manatu lava au, e ese le manaia o le mea lea o le scratch card i le taimi o faatau ma avanoa mai lena mea, aua foi o le card lea e faatau ona tuu ai lea i totonu o lata ato. O le taimi lava e faafuasei mai ai lea fale... o le taimi nei masalo pe lima mita ia ou te nafa ma au, o le faleaoga, o le falesa, o le fale o le faifeau, o le hall ma le fale o lenei aiga, sei vaeatu le paia o le Maota. E faatau lava la le scratch card tuu i le fale, ona fua lava lea o le cashpower. Ae a i ai le taimi e faafuaseia mai ai, ia ona aapa loa lea i le scratch card lea. O le mea lea na ona ou toe faamanatu atu atonu e aoga. Faafetai.

**FOFOGA FETALAI:** Malo faafetai. Tulai mai se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga

Afioga Hon LEAUEPEPE TOLEAFOA APULU FAAFISI (Aana Alofi Nu.1): Malo faafetai. Ou te tulai atu ma le agaga faaaloalo, faafetai mo le avanoa lau Afioga i le Fofoga Fetalai. O le mataupu sa ou tau faamamafa i ai se manatu o lea ua saunoa i ai le sui usufono mo Falelatai ma Samatau. E pei o se lagona lena, e pule lava, ma e atamai foi i latou ua poto faapitoa i mea tau eletise. Ae pei sa mafai ona puipuia le itu lea o amioga foi nei o le taumafai e faaalatua le eletise ina ia mafai ona mumu fua ai. Aua afai o faafofoga tapuai mai le atunu, e leai lava se mea e le oo i ai le atamai leaga o lenei atunu, tulou, nei sala le gagana, e avea le lagomate e tasi ma mea e aafia uma ai le atunu. Ae momoli foi le faafetai i le Matagaluega a le EPC i lo latou onosai ma le galulue i le ao ma le po, e 24 itula, e maeu foi le tautua. Ae o le tagata soifua e lagona foi le vaivai, o le isi taimi ua valaau mai oo atu, o le isi foi taimi valaau mai ae tuai atu. Ae ua ou manatu, o le tasi lea itu aua e abuse lava e le Samoa so o se faiga lelei lava tatou te taumafai e fai. E faapena le uiga o le Samoa e manao ia alu ese ua faasee le isi.

Ae ua ou tulai atu, o le isi mea sei silasila i ai, aua o le tasi lea faiga a o atu le fuamita, oan silasila lea i le mita pe le o faagaoia. A o le taimi nei e le o toe oo i se tulaga faapena, ona talu ai le cashpower. E lelei leaga foi. Ae o le isi mea ou te fia... e le iloa po o le vaega lea o lea e mafua ai le fuafuaga a le Faalapotopotoga e siitia le tau o le eletise, leaga e tele cashpower la e le o toe lelei mita. E valaau mai foi lenei e logo mai, e oo mai lava i le aso e lei oo atu e sui le mita ina ia faaaoga le cashpower, o la e la e mumu fua i le taimi lenei. Ae manaia foi o la e manaia a latou faiga e fai ai, e toe faafoi lava i tua i le tulaga o mita masani. Lelei, o le faiga lena e tatau ona fai ai, ae ou te le iloa po o le le lava o le aufaigaluega, ae anoanoai mita cashpower la e i tua o la e mumu ae ua le mafai ona tai ai se cashpower. Na logo mai foi le Faalapotopotoga, e oo mai lava i le taimi nei e lei oo atu.

O lau tulai atu lea ma le agaga faaaloalo, leaga o tatou o Taitai o le atunu, a i ai se mea e iloa e afaina ai tupe maua a le Malo ma tupe faaalu a le Malo, e tatau ona faafogfa le atunu a o tatou soalaupuleina le mataupu lenei. Ma le faaaloalo faafetai.

**FOFOGA FETALAI:** Malo faafetai saunoa i le sui usufono mamalu. O le a avatu le avanoa mulimuli i se tasi o sui usufono mo Salega, Afioga Afualo Wood Utu Salele ona tuu atu ai lea o le avanoa i le Taitai o le Itu Agai.

**Tulai mai le sui usufono.**

P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga

**Afioga AFUALO WOOD UTI SALELE (Salega):** Faafetai i lau Afioga i le Fofoga Fetalai mo le avanoa. E faatalofa atu foi i le faafogafoga tapuai mai lou itumalo, aemaise o Samoa ua mafai ona potopoto, o i latou foi o lo o faafogafoga mai ma tapuaia le faatamasoalii a lou Palemene.

Sei agai sau faamatalaga i le Lipoti. E faafetai atu i le Taitaifono ona o le Lipoti ttau lea ua i lumamea, ua maea foi ona folasia fautuaga e tusa ai foi o le ala e tatau ona savalia e le Matagaluega ina ia faaleleia atili le auaunaga.

O lea ua tusa nei ma le fa tausaga pe ua sili atu foi talu ona faaaoga e tatou le auaunaga lea o le cash power. So o se atinae lava po o so o se tomai fou lava faa- technology e faaaoga, a tele lava o le tasi i le lua pe tolu tausaga e maua uma ai faafitauli, a o lea e maitau atu nei e le agai i lalo faafitauli i le faaaogaina o le tulaga lea ae agai i luga. O se tulaga lea e tatau ona silasila totoa i ai le Komiti o lo o iloiloina aemaise foi le Afioga i le Minisita. Afai o mita lea e mafua mai ai po o le le faamaoni foi o le atunu, o mea uma lava nei e tutupu ae talitonu sa tapena e le Matagaluega. O le tele o isi vaega nei e le i i ai ni manatu o le a aliali mai, a o le tilotilo i ai ma le vaai totoa i ai, ua sili atu le taugata o le auaunaga ona o le tele o faafitauli lea ua tulai mai, ua atili ai foi ona taugata mo tagata uma lava o lo o faaaogaina le eletise ona o le tele o faafitauli. O le tulaga foi lea o lo o i ai fautuaga e tusa ai o le ave faagaoi, tulou o lou gutu ma le afi e nisi o le malosi lea po o iunite o le eletise.

O lea sa ou vaavaai i le Lipoti, o le fautuaga lea e aumai sa faapea au e i ai se fautuaga e agai tonu lava i le tau o le eletise, aua o i ina tonu lea e mafua ai ona ave faagaoi e le toatele le eletise. Ia taatia ia le toatele o le atunu ma tatou lea e gafatia, a o le toatele o latou la e i lalo le tamaoaiga, e le gafatia ma ua taumafai ai i nei auala, aua po o le a lava le Tulafono e faataoto ina ia mafai ona limataitaiina ai tatou, e soli lava. Aisea? Ona o la e fia ola le tagata.

Sa ou faapea au e agai mai se fautuaga mo se fesoasoani i le malosi faa-eletise. E moni o lea e tatau ona totogi le auaunaga, ae tatau ona fuafua lelei ina ia mautinoa lelei ua lava faasoa le tamaoaiga lea e ia tatou aua o i ina lea e tasi lea vaega ttau o le.....

**Tofa Hon Fonotoe Nuafesili Pierre Lauofo (Sui Palestina):** Lau Afioga i le Fofoga Fetalai o le mea e fia faasao.

**FOFOGA FETALAI:** Se i tulai mai le Sui Palestina.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

**Tofa Hon Fonotoe Nuafesili Pierre Lauofo:** E foliga mai na o le pau lea o le mafuaaga lea ua mafua ai ona ave faagaoi e tagata le eletise. O lea ua faapea mai o le le tagolima po o le le lava o le faasoa, ae anoanoai le mau mafuaaga e ala ai ona ave faagaoi. E i ai lava le isi tagata o la e gafatia ae manao lava i se mea maua fua. A lea na saunoa le sui usufono mo Aana Alofi Nu 1, e taumafai lava e fai se faiga ia maua fua ai le eletise aua foi e le manao e faaalu ai sana tupe? A o la e lava le seleni, a o lea ua e aumai le le faamaoni o le atunu, ae atonu foi o i ai le au le faamaoni o le aufaigaluega a le Matagaluega. O le isi lena mea e tilotilo i ai po o faamaoni foi i latou ia.

O le tulaga lea o le le faamaoni, e maua lava i so o se mea. E maua i soo se nofoaga, e maua i tagata uma ma le anoanoai o isi mafuaaga e mafua ai ona faapena le tulaga o le fia maua fua o le eletise. E pei o le tulaga lea ou te tulai atu ai lau Afioga i le Fofoga Fetalai.

**Afioga Hon PALUSALUE FAAPO II:** Lau Afioga i le Fofoga Fetalai.....

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga ona e matuia le tuuaiga o le aufaigaluega faapea e le faamaoni lea ua saunoa i ai le Sui Palemia.

O lea e faafogafoga mai le aufaigaluega, a o le fesili lea e taumafai atu ai i le sui o lo o saunoa o le mafuaaga na fai ai mea ia. O le mafuaaga o le taumafai o le atunu e maua se fesoasoani e mu fua ai. O le a le mafuaaga, o le taugata o le soifuaga ua leai ni tupe e tua i ai? Aua le tuuaia fua le aufaigaluega.

**FOFOGA FETALAI:** Tulai mai lau Afioga i le Sui Palemia.

**Tofa Hon Fonotoe Nuafesili Pierre Lauofo:** O mea e tutupu, e leai lava se kamupani po o se Matagaluega e sao mai i ni faiga faapea, a o le galuega ma le tiute lena o le Pulega ma tagata uma e taumafai ia foia ni faafitauli faapea. O le agaga lena ua ou tulai atu ai, e le faapea o le limavaivai o le atunu e mafua ai. O la foi e i ai tagata faapena e pei ona saunoa le sui usufono mo Salega. E i ai foi tagata e le faamaoni aua soo se mea lava i le lalolagi nei e i ai lava tagata faapena ma e le mafai ona alofia.

**26 MATI 2014**

P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapototoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga

**FOFOGA FETALAI:** O lea ua maua le faamalamalamaga a lau Afioga i le Sui Palemia o lo o agai tonu i le saunoaga a le sui usufono mamalu. Ou te manatu foi o lea e sagatonu le folasaga a lau Afioga i le sui usufono e ala i le mafuaaga o lea tatou te talanoaina ai lenei Tulafono, ae e tatalo atu ma fautua atu ia ave le tatou fautuaga i le atunu. O le mea e sili o lena ua tatou talanoaina le Lipoti lenei. Ia aua ne i atagia ua tatou faapea atu a mafatia loa soli le Tulafono aua o lo o i ai lava ala o mea e mafai ona uia. O lea foi ua saunoa malamalama le Sui Palemia, ia e faapena le galuega. E leai se atoatoa aua e fai foi o le taumafai mai e tau faasaosao, tulou Samoa ma le faafogfa a le atunu leaga e le aafia matagi i se faamatalaga, a o lo o i ai pea le laufaleaina ma i latou le migao ma le mafaufau lea e tulai mai ai atugaluga nei.

A gasea le Matagaluega e taumafai e faasaosao. O fea o le a o i ai? A soli le Tulafono e ave i le Tulafono. O le agaga lena o lea e taumafai i ai le Matagaluega, o le manatu e ola fua latou ae amo e isi le avega o lea e taumafai e fai? Ia malilie tatou sui usufono ma a tatou fautuaga, tatou tatalo i le atunu ia alofa e tuu nei mea, aua le toe faia lenei mea o le solitulafono o le faagaoi ona ave le eletise. O lea foi ua aumai timaiga ma fautuaga e ala i le Matagaluega ina ia fai foi a latou galuega ina ia o gatasi le futia ma le umele e le gata ina faatino, ae ia faamaoni le faiga.

E tatalo atu i lau Afioga i le sui mamalu aua ou te talitonu ua sagatonu lau saunoaga ma malamalama ae see ese i se isi mataupu.

**Afioga AFUALO WOOD UTI SALELE:** Lau Afioga i le Fofoga Fetalai, ona o lea ua e tali faa-Minisita, o le a see ese foi la se manatu. A o le agaga lea sa moni lava le agaga na avatu ai.

O le upu foi o le le faamaoni, e ese lava le le faamaoni ese le fia ola. O le vaega lona lua, faafetai o lea ua oo le fautuaga i le faaaogaina o malosi eseese ia e pei o le la, suavai ma le faaaogaina foi o le suauu lea e gaosi mai i le siosiomaga e pei o laau toto e i ai le patiki. O lea sa maua foi i suesuega e pei ona faitau atu i ai, ou te masalo e taugata le gaosia o le suauu mai le patiki. E moni o la e i ai le isi ona aoga e faasosolo ai le vanilla, a o le tele o le eleele lea e faaaaoga e toto ai. Ou te masalo e le gafatia a o lena e i ina i le Matagaluega e le gata foi i lea a o le Siosiomaga ma le Ofisa o Faatoaga ina ia silasila totoa i ai. A o le faaaogaina o le la, o lau fesili faamolemole i le Taitaifono, faafetai lava o lea ua faamatuu atu i tua. O se fuafuaga lelei ma le alualu mamao, a o lou popolega lea e i ai, po o le a le umi lea e tatau ona taoto ai aua ua tatau ona tulai mai. Ua tatau ona tali mai le malosi o le la lea ua mafai ina ia fesoasoani i le suauu lea e faaaaoga nei e faaola ai afi o le eletise.

**26 MATI 2014**

P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga

Afai foi la o lea o le a tali mai le malosi o le la aua o lea e faaaoga le suavai aemaise o le savili lea ua i ai, o le a se tele o se faamama avega e mafai ai ona alu i lalo le tau o le eletise mo lo tatou atunuu? Ou te talitonu i le lumanai o le tali lea, ae ou te faafetai tele lava i le Afioga i le Minisita aemaise o lea ua agai tonu lava i le tulaga e tatau ona i ai.

O le isi vaega ona o lea e i ai le fautuaga e tusa ai foi o eletise maumau ua uma ona fai i ai faamatalaga. O le a ou le toe oo i ai ae na o lau fesili lava faamolemole i le Komiti pe e le i i ai se suesuega e agai tonu ina ia mautinoia ua fautuaina le Matagaluega i se auala e mafai ai ona galueaiina lava, pe faatino aemaise lava pisinisi e mafai ona latou gaosia e latou lava le eletise, ona fai lea i ai o se faiga faavae a le Matagaluega e maua mai ai se tupe a le Matagaluega ina ia fesoasoani ai foi aua ua taugata lava. A faigofie ona galueaiina ma faatino le tau lea o le eletise, e taugofie uma lava le soifuaga mo i tatou uma lava aua o le taimi nei o i ina lea e tapuvae tasi i ai le galueaiina o le tamaoaiga, aemaise lava e le gata o masini o lo o faaaoga a o le faaaogaina e tagata taitasi o lenei auaunaga taua.

O le vaega i mita, ou te le iloa pe....o lea foi sa ou faalogologo i le saunoaga a le Minisita e le i mamao tele atu, o lea ua silasila totoa le Matagaluega i isi mita fou. E manaia tele ae talosia ia mautinoia o se faiga fou lea o le a le aveesea ai le tele o le eletise lea e maumau ma fesoasoani ai i le toatuga ma le gasegase o le Matagaluega. Faafetai tele i lau Afioga i le Fofoga Fetalai.

**FOFOGA FETALAI:** Malo saunoa i lau Afioga i le sui usufono mo Salega. O le a avatu le avanoa mulimuli i lau Afioga i le Taitai o le Itu Agai.

**Afioga Hon PALUSALUE FAAPO II:** Faafetai mo le avanoa ua tuuina mai. E le umi foi se manatu. E le toe tau faasilasila i le atunuu le tulaga o i ai le tau o le soifuaga i le sii pea o le tau o le eletise leaga o la ua afaina ai le toatele. E i ai nisi o la ua toe foi i moli matagi. E i ai isi o la ua moli gao faasolo atoa. E le o se upu e avane ai. E mafua aisea? Ona o le siisii o le tau o le eletise. O lea sa fesili atu lenei Itu po o le a le mafuaaga ua faamoemoe ai e sii? O le tali o le totogiina o le aitalafu e \$100milliona lea na aumai. O lea ua amo nei e le atunuu le aitalafu a o le tala a le Malo i le talanoaina o le Tala Autu o le Tupe o la e gafatia e le Malo, e tolu sene mai le tala. Ua saunoa soo i ai le Minisita o Tupe, e tolu sene mai le tala lea e togitogi ai. A o le a le mea lea ua tupu i le aitalafu lea? Ua amo e le atunuu, ua toe foi i moligao, toe foi i moli kalasini le mea ua oo i ai.

**26 MATI 2014**

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Illoiloga**

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai.....

**FOFOGA FETALAI:** O lea ua maua le taamilosaga muamua. Tulai mai lau Afioga i le Sui Palemia.

**Tofa Hon Fonotoe Nuafesili Pierre Lauofo:** E faapefea ona fai le tatou eletise? E faapefea ona faamumu moli, e fai fua? E tatau ona i ai se tupe e fai ai. E nono mai tupe ma faagasolo polokalame a le Matagaluega ina ia momu moli. O la e tagi mai le atunuu e fia momu o latou moli, ae fai fua la?

**Afioga Hon PALUSALUE FAAPO II:** Lau Afioga.....

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** E le fai fua ae fai fuafua. E pei ona saunoa atu lenei Itu, o la ua toe foi i tua le soifuaga o isi. A o le fesili la i le Malo, o le a le mea ua le aumai ai le aitalafu e totogi e tatou, totogi e le Malo i ana Tala Autu o Tupe? O lea e saunoa soo outou Minisita ma le Malo e faapea o la e gafatia ona e tolu sene i le tala. O le a le mea e le aumai ai le aitalafu lea? Ua le iloa e le aufaipisinisi le mea a fai i le taugata o a latou pili o moli. O le taimi nei ua matua le gafatia e le aufaipisinisi le tau o le eletise. A toe faaopoopo atu ma le isi mea lea e fuafua, ia e sili ai le tapuni. O le upu moni lava lena, ua siilima ua le iloa e le aufaipisinisi le mea a fai. Aumai le aitalafu e totogi e le Malo ae se i tau maua se mapaea a le atunuu ua pologa.

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai....

**FOFOGA FETALAI:** Tulai mai lau Afioga i le Sui Palemia.

**Tofa Hon Fonotoe Nuafesili Pierre Lauofo:** O lea o lo o fai fuafua. O galuega na o lea o lo o gafa ma le Faalapotopotoga. O lo o fai fuafua i mea tatou te gafatia ona togitogi ma o le faiga lena o lea e fai ai. O lea e fuafua i le tulaga e gafatia e le aufaipisinisi ma kamupani ma tagata lautele o le atunuu. E faapena, a lea sa faataamilo faatalatalanoaga ma mea uma?

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

O mea uma nei le Taitai o le Itu Agai, e fai muamua faatalatalanoaga ona fai ai lea o faaiuga. E le faapea e nofo nofo lava fai faaiuga. E fai fuafua ona e aumai fuainumera e silasila i ai le Matagaluega ma faapena foi ona silasila i ai le Malo i le mea e talafeagai ma tatau ona fai. O le tulaga lena.

**Afioga Hon PALUSALUE FAAPO II:** O le faalavelave o lea e fai faatalatalanoaga ae le o talanoa ma tagata la e mafatia.

**FOFOGA FETALAI:** Ia malie la sei tulai mai se tasi o sui usufono mamalu mo le Au Palota Taitoatasi, Afioga Maualaivao Pat Ah Him. O le a se mea e finagalo i ai le sui usufono mamalu?

**Afioga Maualaivao Pat Ah Him:** Faafetai lava i lau Afioga i le Fofoga Fetalai, leai o le mea ou te tulai atu ai ma le faaaloalo, ona o le saunoaga a le Afioga i le Taitai o le Itu Agai, o le upu lea o le aufaipisinisi. E lagona ai foi i se isi taimi le tau matamuli laitiiti ona o le toatele o le mamalu o le atunu u e faipisinisi pei o lo o faafogafoga mai, e i ai nisi o lo o faitio pe le o faitio foi. Ae na o se fautuaga lava, ae a pe a faapea o lagona o tagata o le atunu u ae taoto ia le aufaipisinisi leaga e pei a tulituliaupu le vaega lea, e lagona ai foi le le o... a o au lava latou ia, e pei e faapena se agaga. O le mea foi lea na ala ai ona ou lagolagoina lava le fautuaga lea a le Komiti i le mea o le solar power, le la. Ioe. A outou vaai i ai, o nei la, taeao la, atonu o i lava e fofa ai le faafitauli lea. Ma le faaaloalo lava, leai e le faatonua le... e leai, ma le faaaloalo lava, na o se fautuaga pe mafai ona aloaloese ma ia foi gagana. Faafetai lava ma le faaaloalo i lau Afioga i le Fofoga Fetalai.

**FOFOGA FETALAI:** Malo. Ia, tulai mai le sui usufono mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai, ma le faaaloalo tele, o lea ou te vaai atu e pei o lea e gasegase fofoga o le sui usufono lea e saunoa. Ae sili ai lou saunoa i ai e tuumuli nei tei ua afaina ai le tatou Fono, ua uma foi lau poloaiga ananafi. Ma le faaaloalo lava.

**FOFOGA FETALAI:** Ia, o nei i le taeao lea na ou faafetai ai i le Atua ua faafoisia le malosi o se tasi o sui usufono mo le Au Palota Taitoatasi. O lea ua taunuu mai le pepa ua pasi aloaia ona fofoga. Ma e mafai ona pupula i le 24 itula i le taimi lenei talu ona faafoisia lona malosi.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

**Afioga Maualaivao Pat Ah Him:** Faafetai tele lava mo le faaaloalo i lau Afioga i le Fofoga Fetalai. O lea ua malosi atoatoa. Ma le faaaloalo.

**FOFOGA FETALAI:** Ia, tulai maia lau Afioga i le Taitai o le Itu Agai e faaiu mai le saunoaga.

**Afioga Hon PALUSALUE FAAPO II:** Ia, e leai e le faapea ua ou tuliaupuina le aufaipisinisi e pei ona saunoa le sui usufono mamalu. Aua o lea out e molimau atu, e i ai faletalimalo e tai \$10,000+ le pili i le masina pe ova atu foi, ae leai lava ma se tagata asiasi maimoa mai o i ai. Leai o lea out e molimau atu leaga e i ai faletalimalo o lou nuu ma lou itumalo e faapena, ua matua oi lava i le tau o le eletise. O le mea la lea lau Afioga....

**FOFOGA FETALAI:** Ia, sei tulai mai le Minisita o Tupe.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, faafetai mo le faatagaga. O lea e saunoa le Taitai o le Itu Agai e leai ni tagata asiasi maimoa mai, o lona uiga e le tatau ona faaaogaina le eletise, a o lea e fai mai e \$10,000 le pili. O lea tatou te talanoa fai mai ua tele ina toe foi i tua le atunuu. O le taimi lenei, ua ova i le \$30,000+ households ia e i ai le eletise. A tatou talanoa la i le 200 tagata ia latou te faatogafitia le eletise, e le atoa se afa pasene. O lona uiga, o i ina e focus i ai le Faalapotopotoga ina ia faaleleia atili. O le tulaga lea e i ai, tusa o le 80% po o le sili atu tagata ia e totogia le eletise maualalo, e 80%. O le 20% lea latou te totogia i luga atu o le 100 iunite e faaaoga ma le agai i luga. O lona uiga, a laitiiti lou faaaoga o le eletise, e laitiiti lau tupe e totogi. E le o malolo foi pe mapu le Malo i le tulaga e tuu ai i lalo le tau o le eletise ia faaaoga ai vaega ia e saunoa i ai Afioga i sui usufono mamalu o le Palemene, ina ia aua nei toe oo atu i le tulaga e pei ona i ai nei, a ia aumai pea i lalo. O le mea lena o lea e saili ai le Malo i isi mafuaaga e faaaoga ai le la, faaaoga ai vaitafe, faaaoga ai le savili, ma isi lava mau mea, e oo foi i le faaaogaina o le tatou popo po o le pafiti. A faaaoga le popo, e 70% o le atunuu o lo o i ai toganiu. O lona uiga a faaaoga le popo ua 70% e maua galuega i o latou lava fanua ma maua ai le maketi i totonu o Samoa e faatau mai i ai le latou popo. O lea ua 10sene i le popo i le maketi. A tuu foi la i ai le 10sene i le \$1, o lona uiga, o lea ua faatau i le \$100 i le 100 popo. O lona uiga ua lelei le tau o le popo mo tatou tagata ma lelei ai le tatou maketi. E oo foi i le patiki a toto, o le mea foi lena e fai. O le tele o atunuu la, ua latou faaaogaina le patiki e feoai ai latou taavale, e le gata i le faigofie toe lelei mo le tamaoaiga. Ma lou faaaloalo lava.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

**FOFOGA FETALAI:** Malo. Faafetai fesoasoani mai i lau Afioga i le Minisita o Tupe.

**Afioga Hon PALUSALUE FAAPO II:** E tasi lava le mea e fua i ai e le atunu lenei le tau o le eletise, o le atunu lenei e aupito sili lava ona taugata le eletise i le tatou itulagi lenei. O le upu moni lea, o Samoa e aupito sili ona taugata le eletise.

O lona lua lau Afioga i mea nei e tolaulau mai e le Afioga i le Minisita o Tupe, o le popo....

**FOFOGA FETALAI:** Malie lau Afioga i le Taitai o le Itu Agai sei tulai mai le Afioga i le Minisita mo Galuega, Felauaiga ma Atinae Eseese.

**Afioga Hon Manualesagalala Enokati Posala (Minisita mo Galuega, Felauaiga ma Atinae Eseese):** Lau Afioga i le Fofoga Fetalai, atonu o se taimi ona ou tali lea e tusa ai ma fuafuaga na, o lena foi se tau faatali i ai. Ae sei aumai lava faamaumauga e pei ona saunoa le Taitai o le Itu Agai o Samoa le atunu e aupito sili ona taugata, leaga o la e foi e i ai faamaumauga a le Pule Faatonu i le tulaga o le tau o le eletise i totonus o le Pasefika ma atunu o lo o faatusatusa i ai talu le fuafuaga lea e i a ii le siitaga. Ae afai o i ai ni faamaumauga i i, e sili ona tuuina mai sei fuafua i ai tatou polokalame. Ma le faaaloalo.

**FOFOGA FETALAI:** Malie le Taitai o le Itu Agai sei tuu atu le avanoa i le sui usufono mo Siumu. Tulai mai le sui usufono mo Siumu.

**Tofa Hon Tuuu Anasii Leota (Siumu):** Lau Afiga i le Fofoga Fetalai, o lea e saunoa le Taitai o le Itu Agai ua taugata le eletise. O le fautuaga, ia vave tofa ia sefe ai le eletise ma taugofie ai le soifuaga. Ma le faaaloalo lava.

**Afioga Hon PALUSALUE FAAPO II:** Lau Afioga, na o mea malie lava lea e saunoa i ai le sui usufono. Ou te le amanaia foi. A o le mea lea ua saunoa i ai le Minisita o Tupe i le popo, o le vao o le patiki ma na mea uma, ua tapuni le mea lea na fai e se isi faipisinisi o le tatou atunu, lea sa i Vaitele le DESICO. E mafua aisea? E le gafatia. Ua leaga taavale a le STEC ona o le suaau lea na faataitai, ioe.

E leai e moni le mea lena, o le latou double cab fou lava, na ou alu i le fale inisinia la e i Vaitele o tu ai, ae ou fesili atu, ua leaga ona o le suaau lea na fai nei. O le upu moni lea, ma le faaaloalo.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

**FOFOGA FETALAI:** Malie lau Afioga i le Taitai o le Itu Agai. Malie lava lau Afioga i le Minisita, ua faalua ona tuu mai au saunoaga o lea e tau tuliloa faamaoniaga, o lea foi na e saunoa i le tulaga o le le gafatia, o Samoa e taugata. O lona lua, ua faaletonu taavale talu le suauu popo. E faaeteete tele i tulaga ia le Taitai o le Itu Agai, leaga o lea e faafogfa le atunu. O lea e lauvivilu nei le Malo e uunai, uunai, uunai polokalame i mea ia ma o lea ua faamaonia le lelei. A tatou o loa la e tulituli le faamaoniga o mea nei, ona alofa atu lea. Aua o le tulaga e le tatau ona tatou soona lafoa se upu e le ogatusa ma mea nei e tulai mai i faamaumauga nei. Aua ou te talitonu, o lea ua pasia aloaia le saogalemu o le faaaogaina o le suauu popo e faaaoga i taavale. O lea foi na e saunoa nei, o Samoa le atunu e aupito sili ona taugata i le eletise i le Pasefika atoa, a o lea e nofo mai le Afioga i le Minisita o le Faalapotopotoga o Malosiaga Faa-Eletise o lo o i ai faamaumauga o i latou nei e fai fuafua i ai tau o eletise, o lo o fua i ai tau ia sa oulua felafoai ai nei ma le Afioga i le Sui Palemia.

Ou te toe fautua atu lau Afioga i le Taitai o le Itu Agai, aumai mea faamaonia tatou te talanoa ai i totonu o le Maota lenei. Aua a tatou o nei e tulituli mea nei, ona alofa atu lea. O le agaga lena o lea e tau avatu.

Tulai mai lau Afioga i le Minisita mo Punaoa Faanatura ma le Siosiomaga.

**Tofa Hon Faamoetauloa Lealaiauloto Ulaitino Faale Tumaalii:** Faafetai i lau Afioga i le Fofoga Fetalai mo le avanoa. E pei o le tulaga foi lena o lea e tau tulituli atu, o lea foi e taatia i le Maota nei le lafoga a le Minisita, sei aumai faamaumauga nei e table ma ii totonu o e Fonotaga i le Maota nei e faamaonia ai, aua e ese lava le lauga foi lea faapolokiki, faatosina, e pei lava foi ona maua i uluai saunoaga i le Maota. E le valea le atunu o la e faafogfa mai. Aumai faamaumauga maumaututu aua a finau atu nei i le tulaga o le lelei atoatoa o le bio-diesel lea e fai ma standards o le lalolagi o lea e tautu i ai le gaosiga o le oloa lea, ou te le iloa la po o a nisi faamaumauga... ae ou te talosaga atu lava i le mamalu i lau Afioga i le Fofoga Fetalai pe mafai ona table ni faamaumauga maumaututu mai le Taitai o le Itu Agai i le tulaga o le faamaoniga o nei lafoga e fai i totonu o le Maota. Ma lou faaaloalo lava.

**Afioga Hon PALUSALUE FAAPO II:** Lau Afioga i le Fofoga Fetalai, sa ou faapea e le saunoa faapea le Afioga i le Minisita ona o la e i ai le CEO ma le aufaigaluega e fesili i ai pe moni le mea lea ou te fai atu ai. Ou te le alu e saili, e saili e lau Afioga pe afai o le mea lena e te finagalo i ai.

P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga

**FOFOGA FETALAI:** Lau Afioga i le Taitai o le Itu Agai... Malie lau Afioga i le Minisita mo Punaoa Faanatura ma le Siosiomaga, o lea ou te maua atu le mea lea e te saunoa i ai. O le ava lea e fai atu nei. A tatou fai atu nei la o le a faatu mai e le Kabeneta le lafo e table mai mea ia, ona a lea? Aua le avea le naunau e fai ma mea sese, o lea lava e fai atu o le ava i le tatou Fono lea e fai atu. E le mama tuuaiga lea e fai i le bio-diesel, ua leva ona fai fuafuaga a le Malo. Aua nei avea le upu e tasi i le aso, o la e faafofoga le atunuua ua leaga taavale talu le bio-diesel, e le talafeagai.

O le mea lea, faafoi i tua au upu, aveese upu ia ma faamaumauga a le Maota, e le talafeagai. Ua uma ona fai suesuega a le SROS, uma ona fai aiaiga ma tulaga o mea e gafatia ai e saienitisi ma i latou e i ai le poto i nei mea. Sei vaai i ai ua toeititi atoa le 10 tausaga o feoai taavale i le suaau popo ae saunoa faapena? Ia faafoi upu ia i tua, faafoi ma upu ia, "O Samoa o se atunuua e taugata i le eletise." O lea e i ai faamaumauga a Matagaluega, e le sao ia upu.

Tulai mai le sui usufono mamalu e faaauau le saunoaga.

*(Lafoga na toe faafoi: "Ua leaga taavale a le STEC ona o le suaau lea na faataitai, ioe. O le upu moni lea, o Samoa e aupito sili ona taugata le eletise.")*

Afioga Hon Leaupepe Toleafoa Apulu Faafisi: Lau Afioga i le Fofoga Fetalai, ou te ioe i lau saunoaga, ae na ona ou faamanatu atu, o le Taitai o le Itu Agai e fifia e taumafa ava, e le iloa po o se falepia po o se falekalapu sa maua maua mai ai lea lafoga, ae manaia lau faaiuga. Faafetai.

**FOFOGA FETALAI:** Tulai mai le Taitai o le Itu Agai e faaiu mai le saunoaga.

Afioga Hon PALUSALUE FAAPO II: Ou te faamalulu atu foi, ua leaga e le teitei ou faia le tala, ioe. Ae ou te faamalulu atu i lau Afioga i le Minisita pe afai... Ae o lea ua ou fai atu, sei silasila totoa i ai. Na pau lava lea o le mea lau Afioga i le Fofoga Fetalai, o le a ou le toe tali la i isi mea ia. Na pau lava lau talosaga i lau Afioga i le Minisita o Tupe ma le Malo, silasila i le aitalafu lea, aumai e totogi e le Malo, ioe. E le iloa pe faaopoopo i ai na o le 5sene i le \$1. Ae aua le avea e amo e le atunuua, amo e tagata o le aufaipisinisi....

**FOFOGA FETALAI:** Sei tulai mai le Afioga i le Minisita o Tupe.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, o lena e silafia e le Taitai o le Itu Agai, na aumai foi aitalafu sa fai i lona taimi i le malae vaalele, o lea foi ua totogi e le Malo. Ma e le o i inei tuivalea, o lea lava e faasolosolo i le tulaga mo le faamamaavega. O lea ua totogi e le Malo aitalafu na fai mo le faaleleia o le tatou malae vaalele a o i ai le Afioga i le Taitai o le Itu Agai.

**FOFOGA FETALAI:** Faaiu mai le saunoaga lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, o le a ou le toe tali atu i le itu lea. Na pau lava le aitalafu a le malae vaalele, na togitogi lava e le malae vaalele ia. A o le aitalafu lea, e totogi e le atunu. O lea ou te talosaga atu ai, silasila i ai pe mafai.

**FOFOGA FETALAI:** Tulai mai lau Afioga i le Minisita o Tupe.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, o le \$29 miliona lea na aumai totogi e le Malo, o le atunu. O le mea lea e saunoa i ai le Taitai o le Itu Agai ua totogi e le atunu, ia o tupe a le atunu. O le mea lava e tasi, ae le o i inei tuivalea pei lava ona ou fai atu, afai lava o le tulaga lea e i ai, o le mea lena e ao ona fai, ae sei lauiliu i ai le Kapaneta ma silasila le Kapaneta i le tulaga e sili ona lelei mo le atunu. Ma lou faaaloalo lava.

**Afioga Hon PALUSALUE FAAPO II:** Ia, o lea la ua saunoa manino le Minisita e lafo atu i ina e silasila totoa i ai i le tulaga lena. E leaga o le malae vaalele, sa togitogi i le 3sene lea e saunoa i ai le Minisita o Tupe Maua, a o le eletise, e aumai le taga a le tagata. E moni lava la o aitalafu ia a le Malo o tupe foi a le Malo ae le o safai ai tagata ma le aufaipisini e pei o le mau a le Minisita mo Tupe Maua e aumai soo.

O le mea la lea lau Afioga i le Fofoga Fetalai, na ona faataatia atu, ina ia liuliu i ai le tofa i lena Itu ma le Kapaneta. Ma lou faaaloalo lava. Faafetai mo le avanoa.

**FOFOGA FETALAI:** E manatu ua manino ma malamalama lou finagalo lau Afioga i le Taitai o le Itu Agai. Na pau lava lea o le fautuaga a le Maota, o la e faafofoga le tatou atunu, tatou te seu foi le manu ae tagai i le galu. Aua foi nei avea fetufaaiga faapolokiki ma mea tatou te le manatu ai i le isi itu. E i ai e faalele, e i ai foi e maitau.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

O a foi fetuunaiga faapea o saunoaga e lafo i le Malo, o ai le Malo? O le Malo o le atunu. Po o fea le tagat e tuu i ai, o taxations, o mea uma, o lafoga ma mea uma, o mea a le atunu, o le mea lava e tasi. Ae na ona tatou faauiga faapena, o lea ua tau la outou fautuaga i le Malo, e fuafua le fetuunaiga o tau ma ia lava consultations. E le faigofie le galuega a le Faalapotopotoga o le Malosiaga Faa-El; etise o lena tou te silafia, ma o lea lava e alu le tatou galuega, e le o sailiili pito tasi. E tele auala, o suau popo, o patiki, la, savili, ua toeiti titi tatou o i le ogasami le isi mea lea e sosoo. Ona o le a? E le mafai ona tatou fuafuaina le siitai o le tau o le suau i le lalolagi, e le mafai. Ana faapea o puna se suau i Fugalei, ua tatou mapu. A o le taimi lenei, malilie le Maota, ave le tatou fautuaga i le faafitauli lea e tulai mai o le tagofia i auala faasolitulafono o le eletise. O le auala lena e tatau ona faafogofa mai i latou o lea e faia le amio lenei o le le popoi ma le faiga o gaoioiga nei e fai atu ai. A o le fuataga, o lea ua faafogofa le tatou Malo, ave le fautuaga i le mea e tatau i ai ma ave le fautuaga ia i latou e faia le faaiuga.

Ou te manatu lau Afioga i le Taitaifono, e i ai se isi mea faasili e te toe fia tali i ai?

**Tofa TUSA MISI TUPUOLA:** Lau Afioga i le Fofoga Fetalai, na ona ou tulai atu lau Afioga e faafetai i sui usufono na sausaunoa i lenei Lipoti, aemaise ai pei lava ona silasila le mamalu o le Palemene, o le tatou Lipoti lenei e talanoa o le 2009-2010. O le tele o mea ia e aumai e sui usufono mamalu, sei aumai Lipoti i luma mai, ona ou oo mai lea ma aumai le faamalamalamaga o mea na, e pei o le siitaga o le tatou eletise, o isi mau mea ia e aumai. Ae ou te iloa a toe i ai la le Lipoti i luma mai, ona silasila lea i ai o lau Afioga e tusa ai... A o mea lava ia o lo o aumai i le Lipoti lea, o lena lava o lo o aumai manino e le Komiti mo se faaiuga i ai a le Palemene.

E momoli atu foi lau faafetai tele e tusa ai o lo outou finagalo faaalia, ae momoli atu foil au faafetai i le Afioga i le Pule Sili ma le Faalapotopotoga, malo le galulue i le ao ma le po, timuga ma le la a o lo o faaauau pea la outou galuega le faatuaoia. Ia maua pea lo outou malosi, faafetai foi i la outou lagolago i le Komiti i le taimi o ana asiasiga ma ana sailiiliga, e tusa ai o lenei Lipoti. Ma le faaaloalo lau Afioga. Faafetai.

**FOFOGA FETALAI:** Malie lau Afioga i le Taitaifono sei tulai mai le Afioga i le Minisita mo Galuega, Felauaiga ma Atinae Eseese pe i ai se mea faaopoopo.

P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai, faafetai i le alofa o le Atua o lea ua faaauau le Fonotaga a le Palemene i le paia maualuga i ona tafa e fia i lenei taeao. Ou te manatu foi o la e i ai nai aiga o lo matou itumalo o lo o afea i le malaga a le maliu ma le oti, ia faamaise le Atua i tina ma fanau aemaise o aiga.

Ae ou te manatu e ao lava ona oo sau faamatalaga na ona faamanino o vaega sa laga, o le tulaga lea i le malosiaga faafouina, renewable energy pei o lea e tele ina lagalaga mai. Ia o se mea ua leva ona i ai tatou, ua leva ona i ai Samoa i totolu o le vaega lea pe a fua i le tatou hydro power electricity, le tatou afi vai. Ua silia ma le 20 tausaga talu ona faavae mai ia mea, e i ai Taelefaga, Fuluasou, o Alaoa, faatasi ai ma nisi afi sa faaleagaina i afa ua tuanai atu. O lona uiga ua leva ona i totou Samoa, o le tasi lea vaega o lo o lavea i totolu o le malosiaga faafouina, o lo o i ai fuafuaga e fia faaleleia vaega ia sa aafia i matagi ona o le fesoasoani mai a le ADB ma faagaoioi. E pei lava o lae ua i totolu o le tusia o ata le faatinoga o le Loto Samasoni ma le Fale o le Fee ma se vaega o Alaoa sa faaleagaina. O vaega ia a atoatoa ona faalelei o le a atili ai ona lelei le tatou eletise i tulaga tau malosi faafouina. O lo o i ai foi isi potential sides, o vaega e tatau ona oo i ai le fuafuaga mai a tatou afi vai ia ina ia mafai ona faaleleia atoa le tulaga tau malosiaga faafouina.

O le tulaga i le solar system po o le malosiaga mai le la, ua leva, ua silia foi ma le lima tausaga talu ona i ai le tatou malosiaga i le la, o lo o faagaoioi ai le motu o Apolima e pei foi ona i ai lea vaega. O le tausaga 2011 sa oo mai ai le Failautusi a le SBC ona o le fesoasoani mai Iapani e sainia le feagaiga o le 400 kilowatts mo le fesoasoani mai Samoa nei. O lo o i ai le faamoemoe o le masina fou i le aso 11 e tatala ai, ua uma ma maea ona komisi le tatou solar lea, o lo o i ai Salelologa, o Vaitele ma Tanugamanono. O vaega ia e tolu o lea ua maea ona faapipii i ai a tatou... o le aso 11 la o le masina fou e tatala ai. O le mau a le Faalapotopotoga, e tele le suau ua mafai ona sefe mai ina ua mafai ona komisi ma tuu i totolu o le tatou greek solars ia. O le tulaga fiafia lena. Sa faailoa foi i le Failautusi, o Samoa le atumotu muamua o le Pasefika ua mafai ona matuu mai ai, ona o a? Ona o galuega o lo o faatino e le Faalapotopotoga. O a avanoa ua mafai ona aumai, ua taumafai ina ia tomua tatou ia maua ia fesoasoani ma maua ia faamanuiga.

O lea ua amata le galuega o le fesoasoani mai a Niu Sila, e 2.6 mekauati o le solar, lea ua amata ona fausia i luga o fale ia e i Tuanaimato, o la e ua faalelei luga ma ua taumafai fuafuaga, o le taimi o le fono lea e fai mai, e tatala ai fesoasoani ia ua faamatuu mai e Niu Sila.

P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga

O polokalame ia kamupani ia e tau agai mai, ia leaga e aumai ua fai foi le tulaga o suesuega ma studies e tatau ona fai ina ia mautinoa e lelei ona tapena foi lea o le power purchase agreement. O le polokalame foi a kamupani, e tai lua tausaga. E tele lava ina lua tausaga. O lona uiga afai e toai mai nei, ae faatalitali i le lua tausaga ua mafai ona faatino ma faataunu. E le o ni mea faigofie le faatinoga o polokalame nei, e le faigofie foi. A o le tele ia o le fesoasoani ona o la e foi e fai tauofoga faatauofo, sa ave foi le expression of interest sa faatino e le Faalapotopotoga sei tauofo mai ma vaai ni tau e sili ona maualalo ona ave lea i ai o le faamanuiaga. O lea la ua filifilia ai le isi kamupani, le kamupani lea e mafai ona latou gaosi le eletise mai le la i se tau maualalo.

O le tulaga foi i le solar, na o le ao. O le ao le taimi e mafai ona tatou maua ai le tulaga o le eletise mai le la. A oo foi i le po, ua toe faatino i tulaga masani o afi vai ma afi suau. O lona uiga e le faigofie ia vaega. A o tulaga ia tau malosiaga faafouina, o le mea ua leva ona fai, ma o lo o faatino pea le galuega, saili ma taumafia e saili mai se auala e saili mai se auala e tuumama ai le vaega i letau o le tatou eletise.

E oo foi lava i le tulaga lea o le bio-mass lea na galulue faatasi ai ma le Matagaluega o le Siosiomaga, e i ai le kamupani na ave foi i ai le faatuatuaga o latou e... a o le tulaga na i ai, e aumai le laau, o le giant grass. E aumai le Lipoti o le EIA a le Environment impact assessment, e fai si invasive o le species lea. O lona uiga e aumai nei e fai ai le eletise ae afaina ai le tatou siosiomaga, ona taofi ai lea. O lona uiga, e fai foi o le naunau o tatou i se mea taugofie, ae o la e foi e tilotilo i le isi itu ia aua nei aafia lo tatou siosiomaga. E galulue faapena le tulaga faavae o galuega a le Malo o lo o faatino nei. E le faigofie la. O lona uiga, so o se vaega uma ia tapena ma mautu ma lelei.

**FOFOGA FETALAI:** Malie lau Afioga i le Minisita sei tuu atu i le faauilavea a le sui usufono mamalu.

**Tofa Lealailepule Rimoni Aiafi:** Lau Afioga i le Fofoga Fetalai, faafetai lava mo le faamalamalamaina o vaega ia. E taua le mea lea ua saunoa i ai le Minisita. O le fesili; o lea ua mautinoa o le eletise lea mai le vai, le hydro, o le eletise lea e aupito sili ona lelei ma taugofie mo tatou. O le ala foi lea o le taugofie o le eletise ii si atunu o le Pasefika.

O le fesili la; ona o lea ua ou maitau i le Lipoti a le Komiti ma le finagalo o le Minisita, ua tele tele vaega felefefe lea tatou te o e tau saili, ua leva foi ma loa tausaga o fai nei research i le tele o areas nei. O le mea foi ua leva ona fai.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

O le mea lea na faatu ai le SOPAC i Fiti e le region, o mea ia e tilotilo i ai. Pe le taumafai e tilotilo i negotiations ia na fai ma le afioaga i Sili ma isi nuu ia e tetele vai, na pau lava lea o le toomaga o tatou, ma le la. Ua lava nai na mea, ae sei taatia nisi mea pei ona saunoa i ai i laau ma nisi mea, e le ava laau e fai ai na mau mea, ma e le lava eleele e tutu ai.

O le vai lea lau Afioga, toe tagai i ai o le mea aupito sili lea ona taua.

**FOFOGA FETALAI:** O lea ua maua le finagalo o le sui usufono. Na tuu atu lava le avanoa o le ava atu faapea ai o se mea fia malamalama, ae o lefesili fou lea ua tuuina mai, e le toe faatagaina.

Tulai mai le sui usufono e faaauau le tali.

**Afioga Hon MANUALESAGALALA ENOKATI POSALA:** Lau Afioga i le Fofoga fetalai, ona nei faapea mai ai o nofonofo, a o le tulaga o la e faatino. O le faatinoga o galuega ma saililiiga, so o se vaipanoa lava e taumafai e pau le tau o le eletise e pei ona outou naunau i ai, o le tulaga lena o lea e faagaoioi. So o se mea lava e mafai ona... ae ia aua nei afaina. O lo o galulue faatasi ai Matagaluega a le Malo.

O le tulaga aoaotetele lena, o lea foi e maitauina, afaai ae tatala solars ia, malosiaga ia mai le la ua i ai nei, e tele lava se taua mo le faasaoina o le tatou suauu lea e faaolaina ai a tatou afi. E pei o le vaega aoaotetele lena mo le tatou malosiaga faafouina lea e lagalaga soo mai.

A o le tulaga e pei ona i ai, o la e ua tatala Vaitele faa-24 itula. O le fuafuaga, o lea foi e aumai i tulaga o cost cutting matrix. O lona uiga o tulaga e tau faaititia ai tupe faaalu, lea sa taumafai ai i se auala e pei ona i ai scratch cards ia sa i ai. E fai si taugata o le vaega lena i tau o cards ia, o lea sa tilotilo ai i fesootaiga ma le faletupe lea sa mafai ona latou... ae peitai ane o le maliega sa fai ma le faletupe lea e tasi. A o le tausaga lea e faaiuina ai, ona tilotilo lea i se isi faiga pe a uma le konekarate lea, se faiga e aupito sili atu ona lelei mo lea vaega.

A o fautuaga ia ua tuuina mai, o vaega foi na o lea e tilotilo i ai ina ia faaleleia, ae pei o le mea lena sa ave i ai le faamamafa, o tulaga ina ia mafai ona faasaoina tupe faaalu.

O le tulaga i cash power, o lena ua maua. Sa i ai foi le faamoemoe i cash power ia sa aumai i kamupani mai Niu Sila, peitai ane ua maua le faaletonu ma o lea ua taofi ai cash power ia. O la ua i ai le kamupani mai Saina o la ua matauina e lelei, o lea ua fuafua e mafai ona sui ai cash power ia.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

E le o se galuega faigofie aua o lona uiga a ave foi le faatuatuaga i se isi, aua e le o ni mea e mafai ona maua i inei ia tatou, ae avatu i fafo ma e i ai foi faaletonu. E asa lava le faiva ae le asa faaletonu e tulai mai i taumafaiga, a o le agaga lava lea sa taumafai i ai. E taugata le feoai, o le feoai foi o la sa maitauina e i ai faaletonu i lea vaega. E tele foi ina o atu le au tusi mita ae i ai foi loopholes i vaega ia. O le ala foi lena sa fuafua ai i cash power aua e ova ma le 70 aiga ua tuuina i le Ofisa o Leoleo e fai i ai sailiiliga ona e silia ma le 200 cash power na maua o faaletonu mai vaega ia sa fai i ai suesuega. O le mea lena e i ai o le la ua tuuina se i vaavaai e sa faatinoina galuega a le EPC po o aiga lava ma nisi auala na mafai ona i ai faaletonu ia, a o le tulaga lena ua i ai cash power, o lo o ua i ai le faamoemoe o lea o le a fai se division, se vaega faapitoa latou te vaaia le tulaga lea i cash power. E mafai ona o e feoai ma siaki i taimi uma galuega ina ia faaitiitia ai le system loses lea e i ai. O le maitau i ai i le latou update na aumai pe toeitiiti 3% le tulaga i le faaletonu lea sa i ai cash power. O le a lafo ia i ai se i fai sailiiliga a le Ofisa o Leoleo ona maua ai lea o se tulaga mautu i lea vaega.

O le tulaga foi lea i talosaga i street lights ma moli, o mea na o lo o faatino e le Malo ma e i lalo o le CSO po o tupe na o lo o agai mai ma faatino ai le faaleleia o le auaunaga. O le tulaga aoaotetele lena e pei ona molimaunina i le tulaga o lo o faatino ai galuega a le Faalapotopotoga.

Ou te manatu foi e tatau ona oo sau tala i le tulaga lea o le siitaga leaga o lea ua faagaoioi i le vaiaso nei le faalauiroa e le gata i le Pule Faatonu ma le EPC o le siitaga lea ua fuafuaina. O le siitaga e le o i ai se afaina o i latou o lo o faaaoga mai le 50 po o le 1 agai i le 50 iunite. E 2% le 50 agai i luga i le 100 iunite, ma le 7% i le sili atu i le 100 iunite seja oo i le....e level faatas i le aufaipisinisi. O le isi faamama avega la ua i ai ua i ai le discount e 2% e tuuina i le aufaipisinisi ma i latou uma e ova atu i le selau e mafai ona totogi mai e pei o le tulaga lea e vave ona totogi mai, ona aveese ai lea o le 2%. E tai foliga mai e tilotilo po o le 5% le tulaga o le siitaga la e i ai pe afai e ausia tulaga uma ia. O lo o i ai foi le faamoemoe o vaega ia e tolu sa vaevaeina ai o le tau fuafua i le faaaogaina o le eletise ma tulaga ia.

O le poloketi lea o le Power Sector Expansion Project na amata mai i le 2008 seja paia le 2016. O tulaga ia tatou te naunau ia lelei ina ia siitia. Atonu o lena ua matauina ua tele se tulaga ua i ai i lenei taimi i le tatou eletise ina ua fai Fiaga. O lea ua seasea ona faaletonu mai le eletise. O le tau o le suaau o la e tu lava le tau o le suaau, afai e sii i luga ua sii i luga, afai foi e pau i lalo ua pau i lalo. E tusa o vaega na e tuufaatasi ona i ai lea o le siitaga lea ua fuafuaina.

**P.P.2013/2014 Nu.57, Lipoti a le Komiti o Galuega, Felauaiga ma Siosiomaga i le P.P.2011/2012 Nu.60, Faamatalaga o Sini Autu a le Faalapotopotoga o Malosi Faa-Eletise mo le Vaitaimi 2012-2014 & P.P.2011/2012 Nu.92, Lipoti Faaleausaga a le Malosi Faa-Eletise mo le Tausaga 2010/2011 - Iloiloga**

O lea ua fai le galuega lea, o la ua i ai le fuafuaga o le aso 24 o Aperila faatoa amata ai ona faatino vaega ia. Ua ala ona ou taua ia vaega ona o la ua fai le faasalalauga mo le silafia e le tatou Maota.

**Tofa Lealailepule Rimoni Aiafi:** Lau Afioga i le Fofoga Fatalai.....

**FOFOGA FATALAI:** Malie le sui mamalu o lea ua fai atu lau faaiuga e le toe talia ni fesili i le taimi lenei.

**Tofa Lealailepule Rimoni Aiafi:** O lau fesili i le surcharge, le tau leaga o lea na ou lauga ai. O lea e fia malamalama lau Afioga i le Minisita aua e ese le siitaga o le pili le tariff ese le surcharge. Po o faaauau pea la le surcharge lea pe a sii le pili lea ua i ai nei? O lea o le a sau nei le siitaga fou lea o le a i ai le taugata lea o le a i ai, pe faaopoopo pea la i ai ma le surcharge aua o le taimi lenei toeitiiti lava oo i le 33 % le surcharge la e i ai? O le siitaga aupito sili lena ona tigaina ai tagata. Pe aveese la le surcharge pe afai e sii le power?

**FOFOGA FATALAI:** Tulai mai lau Afioga

**Afioga Hon MANUALESAGALALA ENOKATI POSALA:** O lena ua aveese le tulaga lena. O le isi fetuunaiga lena sa tele ina i ai le 28% agai i luga. E le o mautinoa a o le tulaga lea ua i ai o la ua i ai le fuel charge ae ua le toe surcharge. O lona uiga ua laugatasia lava, ma a sii i luga ua sii i luga, a pau foi i lalo ua agai i lalo, a o le tulaga fiafia lena ae e tasi la le tausaga. E amata atu ia Aperila i le tausaga lenei i le tausaga fou ona tilotilo lea o i tatou i se poloketi lea ua amata ona tatala mai i totonu ona i ai lea o le fetuunaiga. Atonu a tele le sau o le solar i totonu ma faaleleia afi vai ia ma lelei le sailiga a le Faalapotopotoga i a latou system loses ia, ona tatou vaavaai lea i se tulaga lelei. E le faigofie le galuega o lo o faatino, e pei lava ona fai atu o le afi e mafai ona e taalo ai, a o le eletise e te le pai i ai. O lona uiga o se galuega e fita tele e le gata ina lamatia le aufaigaluega, ae tele foi....o mea ia e tulai mai, o le tatalo foi lena i le tatou atunuu, ia tatou galulue faatasi. O le naunauga o le Malo ia mafai ona faasopolia le auauauga a le eletise i aiga uma. O la foi e avatu le faatuatuaga, leaga o mea nei o lena e i totonu o outou maota ma outou laoa, tatou galulue faatasi e taua lo outou sao. O le taumafaiga foi lea e i ai a le Malo i nuu i tua ma aiga o lea e ave i ai le faamuamua e faamama le avega.

**26 MATI 2014**

**P.P.2013/2014 Nu 58, Lipoti a le Komiti o Galuega, Felauaiga ma Siosiomaga i le P.P.2011/2012 Nu 65, Lipoti Faaletausaga a le Pulega o Malae Vaalele a Samoa mo le Tausaga 2008/2009 & P.P.2011/2012 Nu.90, Lipoti Faaletausaga a le Pulega o Malae Vaalele a Samoa mo le Tausaga 2009/2010 – Iloiloga**

Lau Afioga i le Fofoga Fetalai, o le tuuaiga foi i le aufaigaluega o la ua i aao o leoleo e fai le saililiiga ma suesuega po o aafia nisi o le aufaigaluega i tulga ia sa faatino ai galuega ia. Afai o aiga foi sa tuuaia, o le tuualalo lena ia tatou galulue fatasi le tatou atunu e mafai ai ona faigofie ma foia le taugata e tulai mai pe a tatou le galulue faatasi. O isi vaega uma e pei ona aumai ai fautuaga, ia lafo mai mea uma na. E faafetai i le Afioga i le Taitaifono ma le lauliliuina ma le latou Komiti o lenei Lipoti, faafetai foi i le Maota mo mataupu lagalaga e faufau ai galuega a le Faalapotopotoga aua se lumanai manuia o le tatou atunu.

**FOFOGA FETALAI:** Malo faafetai le tali malamalama i lau Afioga i le Minisita ma e manatu ua manino le faafogofa a le Maota, aemaise foi le faafogofa tapuai mai a le atunu i lenei mataupu taua i le tulaga tau eletise.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao se pepa e tali atu ai i ana Fautuaga na tuuina mai i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**P.P.2013/2014 NU 58, LIPOTI A LE KOMITI O GALUEGA,  
FELAUAIGA MA SIOSIOMAGA I LE P.P.2011/2012 NU 65, LIPOTI  
FAALETAUSAGA A LE PULEGA O MALAE VAALELE A SAMOA  
MO LE TAUSAGA 2008/2009 & P.P. 2011/2012 NU 90 LIPOTI  
FAALETAUSAGA A LE PULEGA O MALAE VAALELE A SAMOA  
MO LE TAUSAGA 2009/2010 - ILOILOGA**

**Tofa TUSA MISI TUPUOLA:** Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana Saililiiga, Fautuaga ma Iugafono.*

*Faaluaina e le sui usufono mo Aiga i le Tai, sui usufono mo Palota Taitoatas, sui usufono mo Palauli, sui usufono mo Falelatai ma Samatau ma le sui usufono mo Vaimauga Sisifo.*

**Tofa TUSA MISI TUPUOLA:** I le maea ai o ana Iloiloga ua fautuaina ai le Malo e faapea:

**P.P.2013/2014 Nu 58, Lipoti a le Komiti o Galuega, Felauaiga ma Siosiomaga i le P.P.2011/2012 Nu 65, Lipoti Faaletausaga a le Pulega o Malae Vaalele a Samoa mo le Tausaga 2008/2009 & P.P.2011/2012 Nu.90, Lipoti Faaletausaga a le Pulega o Malae Vaalele a Samoa mo le Tausaga 2009/2010 – Iloiloga**

**“FAUTUAGA:**

1. Tuuina atu le fesoasoani a le Malo i le totogiina o le nonogatupe a le Pulega ona o aafiaga o ana tupe maua i le taimi nei.
2. Silasila i le matafaioi o le aoina o tupe totogi o le faaaogaina e kamupani vaalele o le Vateatea, pe ua le talafeagai ona tuuina atu i le Pulega o le Malae Vaalele, ona o le pulega o lo o nafa ma le faatonutonuina o femalagaaiga a vaalele e tusa o aiaiga o la auaunaga.
3. Silasila totoa le Komiti Faatino i malaga i fafo ina ia fuafua lelei ana tupe faaalu i le faatupeina o ia malaga. E le gata i lea ae o le faasoasoaina tatau o ana tupe faaalu i malaga mo polokalame faaleaoaoga a le Aufaigaluega. Afai e taugata le faatupeina o ia malaga ona fetunai lea pe ua le talafeagai le auina mai o se Tagata Poto Faapitoa mo le faatinoina o ia aoaoga i Samoa nei, pe afai e taugofie.
4. Tuuina atu le lagolago i le Pulega mo ana galuega toe faaleleia o lo o fuafua e aofia ai:
  - Se vaega o le Malae Vaalele Faava-o-Malo i Faleolo mo le tulauelolele i ai o vaalele, ua amata ona faletonu.
  - Nofoga e taunuu ma tuuva-a-ese atu ai pasese.
  - Fale mo pasese faapitoa (VIP)
5. Fautuaina le Pulega mo le tausisia o aiaiga o le Tulafono mo le vave faataatiaina mai o ana Lipoti Faaletausaga i le Palemene.

**IUGAFONO:**

I le maea ai o iloiloga a le Komiti na faaiugafonoina ai e fautuaina le Fono Aoao:

Ina ia faamaonia le P.P. 2011/2012 Nu 65, Lipoti Faaletausaga a le Pulega o Malae Vaalele a Samoa mo le Tausaga Faaletupe na faaiuina aso 30 Iuni 2009 & P.P.2011/2012 Nu. 90, Lipoti Faaletausaga a le Pulega o Malae Vaalele a Samoa mo le Tausaga Faaletupe na faaiuina aso 30 Iuni 2010.”

**P.P.2013/2014 Nu 58, Lipoti a le Komiti o Galuega, Felauaiga ma Siosiomaga i le P.P.2011/2012 Nu 65, Lipoti Faaletausaga a le Pulega o Malae Vaalele a Samoa mo le Tausaga 2008/2009 & P.P.2011/2012 Nu.90, Lipoti Faaletausaga a le Pulega o Malae Vaalele a Samoa mo le Tausaga 2009/2010 – Illoiloga**

**FOFOGA FETALAI:** E pei ona silafia e le tatou Maota, o le Lipoti lenei o le 2008/2009. E pei lava o tatou tulaga masani, ua tatou taunu mai ua tautuaupega le taunu mai o le Lipoti a o le a faagasolo pea Taualumaga ona o le faatinoina o le process i tulaga Faapalemene.

Ua matauina ma le totoa i la outou faafogfa aemaise foi o la outou silasila, ua tele ina faatino uma tulaga nei o lo o i ai i nei Lipoti ma e manatu e le tau faasoa i ai le Maota ona ua manino ma malamamala.

Tulai mai se tasi o sui usufono mo le Au Palota Taitoatasi, Susuga Hon Papaliitele Niko Lee Hang.

**Susuga Hon PAPALIITELE NIKO LEE HANG:** Faafetai mo le avanoa, e faamalie atu foi i lau Afioga ona ua fai lau saunoaga i le Lipoti, ae....e fia faamauina foi le agaga faafetai i le Taitaifono ma le Komiti mamalu, ae pau lava le tulaga lea ou te fia fesiligia ai le Komiti ona o lea e maua faamatalaga o le a toe ave e le Pulega o Malae Vaalele le malae vaalele i Fagalii. O lau fesili la i lau Afioga i le Taitaifono i le aafiaga o le Polenia, ona i lau matau o la lava e maua tupe mama a le Kamupani Vaalele o le Polenia i le puleaina e latou o le malae vaalele i Fagalii. O lau fesili ona o lea e matau atu e le o lelei le tupe maua a le Pulega o Malae Vaalele. A toe tuu atu loa ma lea vaega o lo o maua ai tupe mama a le Polenia, o lona uiga e gau le Polenia gau le Puleaga o le Malae Vaalele. E pei o le tulaga lena e fia malamalama i ai lau Afioga.

**FOFOGA FETALAI:** Tulai mai lau Afioga i le Taitaifono, e manatu o lo o i ai nisi a outou Lipoti o lo o agai mai.

**Tofa TUSA MISI TUPUOLA:** O le ala lea o le tulai atu lau Afioga i le Fofoga Fetalai ma e faamalulu atu foi i le sui usufono mamalu ona e le o maua i le Lipoti lea le vaega lea po o le tausaga lenei po o le tausaga lea na tea nei, ae a i ai se isi Lipoti o mulimuli mai, atonu o le a oo mai ai le itu o lo o finagalo i ai le sui usufono mamalu. A o le tulaga i le va o le Polenia ma le Pulega o Malae Vaalele, e le i oo mai se Lipoti i le Komiti. Ma le faaaloalo lava.

**FOFOGA FETALAI:** Tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Lau Afioga i le Fofoga Fetalai, o le fesoasoani atu i le vaega lea leaga o le matou Komiti. O le mea moni lava, o le malae vaalele lea e i Fagalii e le gau. O le taimi na fai ai le malae vaalele e le gau lava le malae vaalele lea leaga e tele le traffic. E ala ona gau pe a tuu faatasi ma aseta a le malae vaalele e tele le depreciation ma tele le capital.

**26 MATI 2014**

**P.P.2013/2014 Nu 58, Lipoti a le Komiti o Galuega, Felauaiga ma Siosiomaga i le P.P.2011/2012 Nu 65, Lipoti Faaletausaga a le Pulega o Malae Vaalele a Samoa mo le Tausaga 2008/2009 & P.P.2011/2012 Nu.90, Lipoti Faaletausaga a le Pulega o Malae Vaalele a Samoa mo le Tausaga 2009/2010 – Illoiloga**

E i ai mafuaaga o lena e silafia e se tasi o sui usufono mo le Au Palota Taitoatasi, Susuga Hon Papaliitele Niko Lee Hang. O le malae vaalele lea i Fagalii e le gau, aua o le mea lea ua ala ai ona gau tele ona ua faaaoga i inei ae le faaaogaina o, a o le Pulega lava ia o Malae Vaalele na fai e le Malo ina ia pulea atoa malae vaalele mo le saogalemu.

Ma le faaaloalo lava.

**FOFOGA FETALAI:** Malo, tulai mai se tasi o sui usufono mo le Au Palota Taitoatasi, Susuga Hon Papaliitele Niko Lee Hang.

**Susuga Hon Papaliitele Niko Lee Hang:** Lau Afioga i le Fofoga Fetalai, ona o lea ua taua e le sui usufono lou igoa i le tulaga lea na ou fesiligia. Ou te le o fai atu e gau le malae vaalele. O operations ia ou te talanoa atu ai i le Pulega o Malae Vaalele, ae ou te iloa e tele tupe e maua mai ai i le faafoeina o se malae vaalele. E pei o le tulaga lena ma le faaaloalo lava.

**FOFOGA FETALAI:** E leai, o lo o manino lau folasaga le sui usufono mamalu. O lo o manino le faatulagaga o lou finagalo ona o le fesiligia ina ia tuu mavaevae ma e manatu foi o lea ua agai le Malo e faatulaga le Pulega e tasi na te tauaveina malae vaalele uma. O le a taatia pea la lea tulaga i le Afioga i le Palemia ma le Kapaneta i Tulafono Faatonutonu e mafai ai ona faatulaga le mea e malupuipuia uma ai tulaga tau malae vaalele, ma e manatu foi ua leva ona faatulaga.

Tulai mai lau Afioga i le Minisita.

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai, o le tulaga i le Lipoti lea o le 2011 lea na totogi ai e le Malo le loan lea sa i ai i le taimi o le sui usufono mo Faleata Sisifo, a o la ua atoatoa ma lelei le faatinoga o galuega a malae vaalele. O le tulaga lea, o lea sa tofia e le Kapaneta le Komiti latou te vaaia le tulaga lea ma lipoti mai. E le i taunuu mai la i le Kapaneta le Lipoti i le tulaga lea i Fagalii. Ma le faaaloalo lava.

**FOFOGA FETALAI:** Malo faafetai.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao se pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**26 MATI 2014**

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueleele mo le Tausaga 2009/2010 – Iloiloga**

E manatu o lea ua tatou taunu i lo tatou taimi malolo, o le a toe faaauau felafolafoaiga e tusa ai o Lipoti pe a toe taliu mai i le malologa masani.

*Na faataatia ese Taualumaga a le Fono Aoao mo lana malologa masani i le itula e 10.45 i le taeao ma toe faaauau i le itula e 11.21 i le taeao.*

**FOFOGA FETALAI:** Ou te faasilasila atu ua toe amatalia nei Taualumaga a le Fono Aoao Taitulafono. E i ai le faamoemoe ua taulelei le tautega i lenei vaega o le aso. E manatu foi ua maua lo outou faasiliga malosi e ala i le taumafaga ti e pei ona tatou masani ai i la tatou malologa masani. E momoli atu pea le agaga faafetai ma le faamalo i le onosai mai o lo tatou Maota, o lea ua tatou taunu i le vaega lona lua o le Lipoti ma a tatou Tulafono e pei ona faatulagaina i a tatou polokalame.

O le a faagasolo a tatou galuega e ala i le faaauauina o le Lipoti e pei ona faatulagaina i le Pepa o Galuega.

**P.P.2013/2014 NU.59, LIPOTI A LE KOMITI O GALUEGA,  
FELAUAIKA MA SIOSIOMAGA I LE P.P.2011/2012 NU.73, LIPOTI  
FAALETAUSAGA A LE PULEGA O FELAUAIKA I LE LAUELEELE  
MO LE TAUSAGA 2009/2010 - ILOILOGA**

**Tofa TUSA MISI TUPUOLA:** Lau Afioga i le Fofoga Fetalai, ua ou tulai atu e avatu le agaga o le faafetai ona ua maea ona tali le sua a lau Afioga ma le taumafaga ti o le taeao a le mamalu o le Palemene, faafetai tele lava mo sauniuniga o lenei taeao aua se faasiliga malosi aua le fonotaga a le Palemene.

Ua ou tulai atu ma le faaaloalo e faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana SAILILIGA, FAUTUAGA MA IUGAFONO.*

*Faaluaina e le sui usufono mo Faasaleleaga Nu.4, se tasi o sui usufono mo le Au Palota Taitoatasi, Afioga Maualaivao Pat Ah Him, le sui usufono mo Aiga i le Tai, le sui usufono mo Palauli ma le sui usufono mo Alataua Sisifo.*

**Tofa TUSA MISI TUPUOLA:** O Fautuaga nei a le Komiti lau Afioga i le Fofoga Fetalai.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

**“FAUTUAGA:**

I le maea ai o Iloiloga a le Komiti, na faaiugafonoina ai e fautuaina le Malo ina ia:-

1. Fautuaina le Pulega, ina ia mataitu lelei le faatinoga o galuega a kamupani po o konekarate fai auala ua faamanuiaina mo galuega a le Malo, ina ia mautinoa le ausia o le tulaga aupito sili ona lelei o ia galuega, ma faaititia ai tupe faaalu a le Malo i le toe faaleleia o auala pe a afaina aemaise lava i taimi o timuga ma le mamafa o uta feaveai a Loli lau uta mamafa.
2. Galulue faatasi ma le Pulega o le Suavai ma le Faalapotopotoga o le Malosi faa-Eletise i le fausiaina o ni faafanua e iloa ai le faataatitaina o laina paipa ma laina eletise ina ia faaititia ai le faaleagaina o le alatele i le fesiitaiga o laina paipa ma laina eletise a ia Faalapotopotoga a le Malo.
3. Faatino ni Polokalame Faalauihoa mo le silafia e afioaga taitasi, o le latou matafaioi o le tausia o alavai o latou auala galue pe a maea ona fausia e le Malo. O lea tulaga o le a faaititia ai tupe faaalu a le Malo i ia galuega faaopoopo ona e le o silafia e le atunu lautele i le taimi nei.
4. Silasila totoa i laisene o taavale o lo o faaaoga e kamupani faatau taavale (Dealer Plate) mo le aveeseina mai o le latou taavale mai le uafu, ona ua matauina le faaaoga faasolitulafono e nisi o le latou ia e resitala ai le latou taavale pe a taulia.
5. Fautuaina le Komiti Faatino ma le Pulega ina ia silasila totoa i le resitalaina o so o se taavale ina ia mautinoa le mulimulitaia o aiaiga mo le saogalemu o femalagaiga i luga o le alatele.
6. Silasila pe ua le talafeagai ona tuuititia le tele o patupatu i vaega uma o le alatele ona o lea ua lelei faagasolo le suiga o le itu auala na ala ai ona fausia. Ua tatau foi i le Pulega ona toe faaauau Polokalame Faalauihoa e saga faamanino ai pea i le atunu femalagaai ia magaala e tuu avanoa ai (give way) isi taavale i isi taavale, ina ia fesoasoani ma faafaigofie ai feoaiga a taavale afi. E tatau foi i le Pulega ona silasila i le tuisaina o faailoilo o le alatele ina ia faaofi i ai ma le gagana Samoa.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

7. Fautuaina le Pulega mo le tausisia pea o le tuuina mai o ana Lipoti Faaletausaga i le Fono Aoao Faitulafono e tusa ma aiaiga o le Tulafono.
8. Faatino ni polokalame faaleaoaoga mo le aufaigaluega e toe tapue ai le aga tapuia ma le va fealoai ma le atunu lautele, i le taliina o telefoni mo mataupu e valaau atu ai le mamalu o le atunu, ona na matauina e le Komiti ni faasea a nisi o le atunu i lea tulaga.

#### IUGAFONO:

**I le maea o iloiloga a le Komiti na faaiugafonoina ai e fautuaina le Fono Aoao,**

**Ina ia faamaonia le P.P.2012/2013 Nu.73, Lipoti Faaletausaga a le Pulega o Felauaiga i le Laueelele mo le Tausaga Faaletupe na faaiuina aso 30 Iuni 2010.”**

Ma le faaaloalo lau Afioga i le Fofoga Fetalai, o le tele o Fautuaga ia na avatu e le Komiti, 1, 2, 3, 5, 6 ma le 8, o le taimi nei ua maua mai le faaaliga i le Komiti ua maea ona galulue ai ma ua faatino e le Pulega o Felauaiga ia vaega ma o le latou uluai Lipoti foi lea talu ona faavaeina lea Matagaluega a le Malo.

Ma lou faaaloalo lava.

**FOFOGA FETALAI:** Malo faafetai mo le saunoaga manino a lau Afioga i le Taitaifono. O le agaga ma le autu foi lena o lea e faafofoga atu sui usufono, e fua foi i ai a latou tuleiga ma saunoaga e agai tonu i le Lipoti lenei ona ua fai foi sina umi o taatia i luga o le Laulau a Fono. O le 9, 10, 11, 12, 13 ma le 14 lenei, ae ona o le tulaga o lo o ave pea le avanoa e tusa ai ma Tulafono Tumau.

Tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Lau Afioga i le Fofoga Fetalai, faafetai i le Afioga i le Taitaifono o le Komiti e tusa ai o le Lipoti ua tuuina mai i le Palemene ua atoatoa ona faatino. Faafetai foi i le Afioga i le Minisita ma le Matagaluega i galuega faifai pea e tusa ai o auala aua femalagaaiga a le atunu ona ua matauina le tele o suiga lelei o lo o i ai.

E fia fai se manatu lau Afioga i le Fofoga Fetalai aua e moni lava ua loa le Lipoti, ae i ai nai mataupu nei se i silasila ane i ai le Matagaluega. Faafetai o lea ua laga e le Komiti le vaega lea i patupatu.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

Ou te iloa tasi lea vaega ua tatau ona tagai i ai le Matagaluega ina ia faaitiitia pe aveeseina le tele o nei patupatu, ae ua lava luma o aoga ma mea e tele ai tagata e feoai e faatino ai. O le tele foi o nei patupatu lau Afioga i le Fofoga Fatalai, e le lelei ona fai i le taimi sa fai ai ona e pei sa faavavevave ona fai i le taimi o le suiga o le itu auala.

O le uiga o lau faamatalaga, e eseese le maualuluga eseese le lautetele o patupatu. O le tele foi o patupatu e le o toe valia. E te alu atu lava la i le tele o taimi ua galo ia te oe, faatoa e iloa lava ina ua faaletonu ai lau taavale lea na iu lava ina maumau ai le soifua lea na lipotia mai ai i le leitio ona o le patupatu lea na afaina ai le ao o se tama i totonu o se pasi. O lona uiga ua tatau i le Pulega ona fai se fuafuaga i lea tulaga. E le gata i lea o le taulaga i le kolosi lea mai le NPF Plaza e alu i le Development Bank, e leai se kolosi i ina ae ua matauina le tele o le faalavelave o le atunu i le vaega lea o le auala i aso uma, aso uma. O lea foi na lavea ai le tagata e le i mamaao atu ona e le tatau ona kolosi i ina tagata, ae ua fai pea ma amio. Po o le a se fuafuaga a le Pulega i le vaega lea po o le a se ituaiga faiga e fai ai, pe fai se pa e pupuni ai po o le a lava se auala, ae ua tatau ona tagai i ai ina ia faaitiitia faalavelave tutupu faafuasei i lea tulaga.

O le mea foi lea sa tupu i le kolosi i le NPF ina ua sii mai i uta, sa o pea tagata i le mea tuai, a o lea ua amata ona masani tagata. E faifai lava lelei pe afai ua i ai ni nai auala e faaitiitia ai lea vaega.

O le isi vaega taua lea na laga e le Komiti, o mea ia o road signage. E tasi lea faitioga tele a turisi ia e aumai. Ou te le mautinoa la po o le Pulega o Tagata Asiasi Maimoa Mai Fafo e fitoitonu i ai lea tulaga ona e leai ni faailoilo i auala. A e sau mai o i le malae vaalele, o fea e agai i ai, o le a le mamaao ma le taulaga. O auala faapena aua a oo mai i Leulumoega e ao ona fai ai se sign i ina ina e faailoa a ii tagata ia o i tua i le mea o lo o tele ai isi fale talimalo ma mataaga, ae e leai ni road signage o i ai ma e faigata tele ma e tatau ona tagai i ai lau Afioga i le Minisita.

O le isi vaega taua lau Afioga i le Minisia ma le Pulega, ua leva tele ona feoai tatou i lane ia tailua, ua tatau ona fai se fuafuaga a le Pulega e fai se faalauiola i le atunu. O le mea lea e tupu, e le o malamalama tagata i le faaaogaina o le two lanes po o auala nei e lua. E tusa lava o le pasi, o le loli, o taavale e o lemu, e o i le ogatotonu ua poloka atoa ai le auala. E tatau ona faalauiola, aua a telegese o i autafa, ae faaavanoa le ogatotonu e overtake ai ma taavale o lo o saoasaoa. O le mea lena e tatau ona agai iai lau Afioga ua tatau ona fai se aoaoga mo le atunu. Ae le gata i lea o avepasi, o lea tatou te maitauina uma lava, e alu alu lava tu i le ogatotonu o auala. Sa fai le polokalame lea o bus stop ua leva ona fai mai e le Malo i ia aso, fai tuu, fai tuu. O lea la ou te le o malamalama po o fea tonu o agai i ai lea vaega lau Afioga, aemaise la o mea nei e tai two lanes ona tu lava lea o le pasi ia i le ogatotonu o le auala, ua poloka atoa. Sei tagai ane i ai lau Afioga.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

O le isi vaega lau Afioga, o le Tulafono foi lea ua sui nei i Niu Sila, ou te talitonu toe lava o tatou le atunuu lea e...

**FOFOGA FETALAI:** Malie le Satini o le Maota sei aveane i luga le Tusi Paia a le sui usufono o lo o saunoa.

**Tofa LEALAILEPULE RIMONI AIAFI:** Thank you Honourable Speaker.

**FOFOGA FETALAI:** E tatau ona faaaloalogia le Tusi Paia e le tatau ona lavea i lou aao pe a fai au saunoaga. Tulai mai le sui usufono mamalu.

**Tofa LEALAILEPULE RIMONI AIAFI:** O le Tulafono lea ou te talanoa atu ail au Afioga, o le Tulafono lea na sui atu nei e Niu Sila, sa sui e Ausetalia e lei mamao atu i tua, o le Tulafono lea a sau le taavale ua fia afe mai totonu ona give way lea o le taavale lea e alu atu i le... ou te le iloa po o le a tonu le Tulafono, ae ua tatau ona toe tagai i ai lau Afioga e toe sui leaga o lea ua saunoa lena Itu aemaise o le Sui Palemia ananafi, o lea tatou te taumafai e faataitai ia Niu Sila ma Ausetalia, ua tatau foi la ona tatou faataitai i le Tulafono lea aua e lavevea ai tagata. E i ai tagata e lavevea i le Tulafono lea pe a le sua le Tulafono lea e fai e tatou, o la e te masau mai tua, ae tei lava ua give way le taavale lea e i luma i le taavale la e afe mai totonu. E tatau ona tagai i ai lau Afioga i le Tulafono lea masalo o lena e malamalama i ai mo le agai i luma.

O le isi vaega e tatau ona faamanatu i le atunuu lau Afioga, o le stop sign. O le stop sign, o le taofi, e tatau ona taofi le taavale, a o le mea lea e tele ina fai e tatou e faalemu. A le faalemuina e le tilotilo i le sign. O le mea lea o lea e tupu e tele ai taavale lavevea, aemaise lava i le itumalo lea o matou i Vaitele, aua o i ina e aupito sili ona tele ai magafa. Ou te iloa o magafa i Vaitele, o le lata i le 50. Faamolemole lau Afioga, e tatau ona faamalosia e toe fai sign ia, faailoilo nei. O lo o i ai le faafitauli e fai ma faaleaga e tagata i isi taimi, ae le mafai ona tatou alo ai i lea vaega lau Afioga, e tatau ona toe faaaauau le faiga o faailoilo nei, ina ia faaititia le tulai mai pea o nei faalavelave i le vaega lea, e le gata i stop signs, a o autafa la o auala, aua e tau le iloa faailoilo ona o le uumi o le vao ma tulaga faapena. Sei alofa o lo o tele lava galuega faatino atu i lea vaega, pe mafai ona toe tagai ane i ai i le vaega lea lau Afioga.

O le isi mea a o tatou sauni atu i le fono lea e fotuai mai, o auala ia i totonu o le taulaga. O le auala lea ua uma ona declare e le Malo o le public road, lea e oso atu i le va o Amau, o le a matua tele o le faaletonu i lena auala ae toatele tagata e uia i aso uma lava. Afai o le auala o le Malo lau Afioga, sei e tagai ane i ai, e tatau ona faatino lea auala i le ogatotonu o le taulaga, ma e tele foi ina faaaogaina e le atunuu.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

A o le tele lava o tatou auala, e avatu lava le faafetai i le vave ona togafitia ma faaleleia i le taimi e faaletonu ai. E le taugofie e le faigofie foi la outou galuega, ae malo le galulue, sei toe tagai foi i le siitaga o nai pasi ma nai taxi, ae taatia atu i ina e te tagai i ai, e fai foi o le naunau e sii totogi o taavale, ona o le taugata o le penisini, ae fai fuafua foi i nai tagata e feoai ai. Ia manuia tele le Fono faafetai.

**FOFOGA FETALAI:** Malo faafetai. Ia, o le a ave le avanoa i lea Itu o le Maota. Tulai mai lau Afioga i se tasi o sui usufono mo le Au Palota Taitoatasi, Susuga Hon Papaliitele Niko Lee Hang, ona sosoo ai lea ma le sui usufono mo Siumu ona faapena lea ona felafoai mai le tatou galuega.

Tulai mai le sui usufono mamalu.

**Susuga Hon PAPALIITELE NIKO LEE HANG:** Faafetai atu i lau Afioga i le Fofoga Fetalai mo lou avanoa. Ia e fia faamauina foi le agaga faafetai i le Taitaifono o le Komiti aemaise o sui usufono o le Komiti sa tapenaina lenei Lipoti. Malo lava le tauatai.

Lau Afioga i le Fofoga Fetalai, na o le lua lava nai mataupu ia e fia fesiligia ai le Taitaifono mo se faamalamalamaga atili. O le Fautuaga 4 lea faamolemole i le tulaga lea faasolitulafono lea e taua i le fautuaga i taavale foi nei e kilia mai e le au faatau taavale mai le uafu lea e faapea e faaaoga ni plates e le talafeagai. O lau fesili la faamolemole, po o le mea ea e faataga ona aumai mai le uafu ave loa i le car dealer, o le a la le faaaogaina lea e solitulafono, po o le toe faaaoga lava o le plate lea e femalagaai ai i le aualatele? O le mea lea e fia malamalama ai lau Afioga.

Ma le isi fesili faamolemole i le Fautuaga 5, e fautuaina le Pulega, sei tagai ane lava i le tatou vehicle policy lea ua faatulaga mai e faiga faavae a le Malo, o lo o taua ai le policy lea i le faapogisaina o tioata o taavale, tinted windows. O la e tapu mai i ina i faiga faavae ia tulaga ia, aemaise la le tele o taavale a le Malo lea ou te maitauina, ua faapogisa uma lava taavale. A o le a la se silasila a le Pulega ona o lea e i ai le faiga faavae lea? Sei tagai ane i ai ma faamolemole sei utagia ma usitaia tulaga ia.

E pei o le tulaga lea e fautuaina ai lau Afioga aemaise o le Pulega.

**FOFOGA FETALAI:** Malo. Ia tulai mai le sui usufono mo Siumu.

**Tofa Hon TUUU ANASII LEOTA:** Faafetai i lau Afioga mo le avanoa. Ou te tulai atu e fai sina manatu puupuu lava e tusa ai o lenei Lipoti. E i ai lava le talitonuga lau Afioga, o lo o i ai lou agaga ma le manatu foi o le Malo ina ia faanatinati tatou Lipoti, a o nai mea taua ia e ala ai ona tulai atu. Ou te matua ioe i le saunoaga a le sui usufono mo Faleata Sisifo i mea ia o double lanes ia, ona o lo o maitauina pea le tele o taavale a malaga ai ona o lemu ai lava lea ae o lo o i ai le naunautaiga o le atunu e i ai nisi o lo o fia teleai i galuega ma mea o fuafuaina.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

O lea la e manatu ai i le Komiti foi ma le Matagaluega ina ia silasila totoa i ai po o fai ni faalauloa, ina ia silafia e le atunuu tulaga ia, ina ia faapena ona faavanoa pea le ala i totonu mo i latou o lo o teletelei ma o lo o naunau e i ai mea o lo o fia vave malaga i ai.

Lona lua lau Afioga, o lo o i ai le fautuaga ina ia silasila i se tulaga foi lea pe fai ni aoga a aveloli ma avevasi pe valaau atu i le Ofisa ina ia faamanatu pea ia i latou o lo o avea taavale tetele nei aemaise lava pasi. Ua silafia e lau Afioga ma le mamalu o lenei Maota le tele lava o faafitauli e tutupu mai, ae i ai le agaga ina ia faamanatu pea ia i latou i toe tulai mai foi nisi faafitauli i pasi ma taavale tetele o lo o tutupu mai ai faafitauli.

Lau Afioga o le isi manatu e tuuina atu pea i le Matagaluega ma le Komiti, i taavale lapopoa lava nei, o lo o maitauina le auala lea e agai atu i Tiavi agai atu ai i Siumu, Safata ma Falealili, e i ai taimi e poloka atoa ai le auala e lolii lau uta nei ma pasi. E i ai le taimi e toeiti lava oo mai le solo a taavale i Apia nei, a o la e o o lemu lava taavale lapopoa nei, ina ia fautuaina, a i ai se tulaga faapena o lo o faateletelegese a latou taavale, ina ia alofagia e faaautafa, ae tuu le avanoa i taavale o lo o faapena ona moomia le fia agai vave i fuafuaga ma mea o lo o i ai le taumafaiga foi a le atunuu ina ia fia vave oo i mea o lo o fia agai i ai.

O nai manatu ia lau Afioga, ae pe mafai ona ou oo lava i si ou itumalo i le itula lenei, ona o le taeao lenei, o se tasi lenei o taeao iloga, o se tasi o taeao faitaulia i totonu o lenei itumalo. O le taeao lenei o lo o faataoto ai le maa faafuagalu po o le maatulimanu foi o le faleaoga tulagalua o lenei itumalo o lo o faapena ona fausia e le Malo o Saina i lona agalelei mai.

O lea la e faapai atu ai i le tatou itumalo, ua le mafai ona tatou auai, ona o tuatuagia o le Fonotaga pei ona outou faafofoga mai i ai i le aso. Ae momoli atu le faafetai ma le faamalo i le Malo o Saina ona o lana fesoasoani, ae faafetai foi ua manuia le tatou itumalo i lenei faamanuiaga ua oo mai. Ia, le paia ia Sa Asomua ma Aiga e Lua ma lau Fetalaiga Tuuu ma le tou Aiga Sa Tuuu, le Falelua o Tulafale, le Fofoga o le Alataua, Utaileuo ma le mamalu o le Faletolu, sagai ane ai o le tai, tatou lagolago le galuega ua faataoto atu. Ia silasila totoa ane ina ia vaavaai faalelei nai alii Saina o lo o faapena ona agalelei mai ma fesoasoani mai i le tatou galuega. Ia alofa le Atua ia faapena ona i ai Ona aao alofa ia i latou o lo o faapena ona galulue, ia faamanuia foi le Atua i le mamalu o le tatou itumalo. Faafetai mo le avanoa.

**FOFOGA FETALAI:** Malo faafetai. Ia, tulai mai lau Afioga i le sui usufono mo Sagaga le Usoga.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

Afioga MUAGUTUTAGATA FAAMAUSILI AUIMATAGI PETER AH HIM (Sagaga le Usoga): Faafetai i lau Afioga i le Fofoga Fatalai mo le avanoa, sei fai atu foi se sao o Sagaga le Usoga e tusa ai ma le tatou Lipoti i lenei taeao. E avatu foi le faamalo i le Taitafono o le Komiti ma le latou Komiti ma le galuega.

E avea foi lenei avanoa lau Afioga i le Fofoga Fatalai e fia momoli atu ai le faafetai i lau Afioga i le Minisita mo Galuega, Felauaiga ma Atinae Eseese ma le Pulega o le LTA, ona o se manatu sa ou lauga ai i le Pacaiga ua sola, po o se taimi foi ua sola, i le faamauina lea o igoa o taxi i tino o taavale, ona o se mataupu sa ou faamamafaina, e tatau ona faapipii igoa o taxi i tino o a latou taavale ona e foia ai le tele o faafitauli i tulaga tau solitulafono sa tulai mai foi i lene vaitau. Ae o le taimi nei, faafetai tele i le Matagaluega, ua ae se tofa, ua faatino lea galuega lelei, e le tau alu ai le tagata e tau vaai le numera o le taxi po o le a le taxi lea e alu ai, ae o lea ua manai afaia lava o le Togo Aasa, e te iloagofie lava le Togo Aasa i le Numera 74. A sue la le taxi lena, e mauagofie lava, ua faigata foi ona faaosofia le au ave taxi i ni tulaga solitulafono.

E momoli atu ai foi le faafetai i le aufai taavale, le aufai taxi i le latou talia lelei o le faatalauula atu a le Matagaluega ina ia faia nei tulaga i le galulue faatasi o le aufai taavale laupasese ma le Matagaluega.

O le tulaga i le Tulafono lea ua toe fesuiai foi e Niu Sila, a e liliu i le itu tauagavale, ona e give way lea i le itu taumatau. O lea ua toe fesuiai uma e Niu Sila, ua taofi na faiga, a o lea ua tei foi ua tatou faia i inei i Samoa, a e liliu i le itu agavale mo se faataitaiga pe a e sau i uta i Lalovaea e te fia afe i Savalalo i luma o le Lucky Foodtown, ua tu ita ae faasolo mai taavale e omai o.

O le taimi nei, ua taofi e Niu Sila lena faiga ona ua maua e tele faalavelave ua tutupu ai. O le mea lea e talosaga atu ai i lau Afioga i le Minisita, sei toe silasila ane i lea vaega ona ua talitonu ua le talafeagai mo lenei foi vaitau, e talitonu foi o le mea lena ua suia ai e atunu mamao ona e le o se tulafono lelei. E talitonu foi o lena faiga, ua te i lava ua faatino e o tatou tagata ae leai se....masalo e le o i totonu o se tusi road code.

Ona matou oo mai lea i patupatu, faafetai tele lava i le Matagaluega i le toe faaleleia o le tele o patupatu sa i ai, ua faafaigofie ona o ai i luga taavale, ua pei foi lele ua tau faalauaitele le oo atu o le taavale ona ae atu ai lea i luga, ae maitauina i le vайaso lea na tea nei i le matou malaga atu ai i Savaii, ia o la e tumau lava patupatu i le mea tuai, toe tele naua, oka! matautia le faaleaga taavale o patupatu la e i Savaii. Ia sei silasila ane i ai le tatou Matagaluega, pe le ua ono faalelei foi ia na tulaga aua o lo o feoai atu ai a tatou tagata tafafao maimoa mai ma tulaga faapena.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

Ona faaaogaina lea o le avanoa lau Afioga i le Fofoga Fetalai, ona ua maua se avanoa ou te talosaga atu ai i le Afioga i le Minisita mo Galuega, Felauaiga ma Atinae Eseese, o le tapeina lea o le tatou eletise i le Aso Toonai. Lau Afioga i le Minisita, o nai matou pisinisi tau atiae e afa aso i le Aso Toonai, e tapuni i le 1:00 i le aoauli ae amata ona tape mai le tatou paoa pe a fai ni galuega i le 11:00. O lau talosaga, o i i le matou tamai faleoloa o lo o photocopy ai le tele o pepa a le faifeau i Aso Toonai aua foi ia tapuaiga i le Aso Sa, a pe la le paoa i le 11:00 i le Aso Toonai, ia ona tutu ai lava lea o le faifeau ua le iloa po o le a le mea o le a fai ua le faia le pepa e ave i le ekalesia i le Aso Sa. O le matou talosaga la pe le mafai faamolemole? A mafai lelei, a le mafai ia, a fai ni a tatou galuega i le Aso Toonai, pe le mafai ona tape le paoa i le 1:00 po o le 1:30 ina ia faasaoina ai a matou galuega. O matou nei e le lava ni tupe e faatau ai ni ari faaleoleo. Ma le agaga faaaloalo. E faafuasei lava ona pe mai i le 10:00 po o le 11:00, ia ta te matamuli o la ua tutu se faifeau ua faatoese atu ai, te i lava lea ua ou faatoese atu ai fua i le faifeau a o le power a le EPC. Ia o le talosaga lena ma le agaga faaaloalo. A faapea e mafai, lelei, a leai, ia. Pau na o nai mataupu lau Afioga i le Fofoga Fetalai e avatu ai se matou sao i lenei taeao aua foi le Fonousu a le tatou atunu. Manuia le Fono.

**FOFOGA FETALAI:** Malo, o lea ua maua le finagalo o le sui usufono. O le a sooula ma le sui usufono mo Aleipata Itupa i Lalo, sa e fia tulai mai?

**Afioga TAFUA MALUELUE TAFUA:** Pei ua ou faalogo atu lau Afioga i le Fofoga Fetalai ma le mamalu o le Palemene, o lea e sue se generator a lou tuaoi, ia a o au o la e i ai lau generator na aumai i Tutuila, afaia la e finagalo le uso na te faatauina, ia e faapau lava le tau e 50% le discount. Ma le faaaloalo.

E laititi lava nai mataupu na ou fia talanoa ai lau Afioga i le Fofoga Fetalai, muamua a o lei faia se tala i le Lipoti, muamua ona momoli atu le agaga faafetai, pei foi o isi sui usufono ua maea ona saunoa, e momoli le agaga faafetai i le Taitaifono ia ma le Komiti. Masalo tasi lenei Komiti ese le atamamai o sui a usufono lea e i ai, ona o le mananaia o a latou fautuaga e tuuina mai, atonu po o le eseese o matafaioi po o background e omai ai latou, o le mananaia foi lea o fautuaga a le Komiti, o la e soisoi si au uo le sui usufono mo Aana Alofi Nu. 3. O le sui usufono mo Gagaemauga Nu. 2, sui usufono mo Faleata Sisifo, sui usufono mo Faasaleleaga Nu. 4, sui usufono mo Aleipata Itupa i Luga, ma le sui usufono mo Palauli. E le faapea la e tau selu i a outou Afioga, malo faafetai, o le mananaia ia o le Lipoti – ma o le ala foi lea o le tulai atu, e faaopoopo ma paelago le finagalo ua faaalia.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

O le mea muamua lau Afioga i le Fofoga Fatalai, o le fautuaga lona lua, lea e faapea e galulue faatasi le Pulega o le Suavai ma le Faalapotopotoga Malosi Faaletise i le fausiaina o faafanua e iloa ai le faataatitaina o laina paipa ma laina eletise. Ma le faaaloalo lau Afioga, o se mea ua leva ma alagatatau ona faatino e le tatou Malo – ma e momoli atu ai le agaga faafetai i le Komiti, ona ou te matua lagolagoina malosi ia le fautuaga ua tuuina mai.

E faaopoopo atu ai ma se manatu, o le tele o popo e sua lelei ai le lolo, a tele sulu, lelei e maua ai foi figota lelei. O le manaia o le faaopoopoga lea i le fautuaga lona lua lau Afioga i le Fatalai, e le na o le pau lea o le vaega o lo o latou eliina le autafa o le auala e faataoto latou laina, o le suavai, eletise, telefoni, o le vaega o le MCIT, o le suauu lea e i ai nei le paipa suauu la e alu i le autafa o le auala, e alu lava i luga o le moa o le auala i luma ane o le fale o le Malo, ia ma le suavai, ma le faaaloalo. O le tulaga la e i ai pei o atunu i fafo, e suisui le lanu o paipa e faailoagofie ai pe a fai le faafanua lea po o le taiala e faailoa ai le faataatitaina o laina. A o laina la e eli e le Malo, e tasi lava le paipa tele lava e tuu i ai, masalo pe o le diameter pe 3futu ia pe sili atu foi, ona aumai loa lea o isi paipa ia a isi lala o le Malo faapea foi ma vaega tumaoti, ona totogi lea e latou le lisi i le paipa tele lea a le Malo ae faaalu ai. O i ina foi e laveai ai le eli soo ma le faaleagaina o le auala, ae i ai foi le faafanua e so o se konekarate na te maua le faatinoina o le galuega, e muamua lava aumai le plan lea po o le faafanua o le autafa o le auala e silasila tonu i ai po o fea tonu e alu ai le paipa lapoa lea a le Malo, e faafaigofie ai le fausia ma le faiga lelei o galuega.

O le isi manatu e fia faaopoopo atu i le fautuaga lona ono, o le vaega lea o tatou patupatu, e malaga i tua i le tele o weekend ia a o patupatu lava ia e sili ona tuga ma faaleaga taavale i le matou o agai i tua i Aleipata, o le patupatu lea i Lufilufi ma le patupatu lea e i Faleapuna. O patupatu ia e lua, afai ua le mafai ona fausia ia lelei mo le saogalemu o taavale, ae ua tele ina faaleagaina ai a matou taavale, e le gata, tulou e papa ai pau o taavale, ae faaleaga lava taavale o patupatu ia e maualuluga tele le faiga toe le lamolemole lelei mo le osofaia e le taavale pe a oso i luga. O lea e tuualalo atu ai ma le faaaloalo, faamolemole pe mafai ona aveese patupatu ia e lua, a leai, ia toe faaleleia mo le feoai o le atunu.

O le mea mulimuli lau Afioga i le Fofoga Fatalai, o le vaega lea sa lauga ai se tasi o sui usufono mea foi ia o taavale e alualu lemu i le auala. Talu ai o lea e lumanai le tatou fonotaga foi lea o le SIDS, o le a tele taavale feoai ma fesoasoani mo le aualatele.

O lea e talosaga atu ai i le Afioga i le Minisita ma la outou Komiti, pe faamata e ono mafai ona fai ni tatou lanes foi ia i auala sasao pei o le alu i le malae vaalele, o le alu agai i tua ia matou, e faapea foi ma le alu i Safata, auala lea e i Lefaga, ae fai ai ni mea o ni overtaking lanes, pe na o le 50 i le 100mita le umi.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

A alualu lemu le taavale ia ona soso lea i le autafa lea ae tuu lea o le avanoa i taavale e o saoasaoa e overtake ai ma o latou ae o lemu latou i le lane lea, aua e faapena foi i la atunu i fafo, e i ai mea o overtaking lanes po o laina ia faapitoa, e alualu lemu loa le taavale ia oso i ai ae o atu taavale la e saoasaoa e fia vave o i le mea e o i ai, ia ona overtake ai lea o le taavale lea. Pei o nai manatu ia lau Afioga i le Fofoga Fatalai, ia manuia lava lenei aso.

**FOFOGA FETALAI:** Malo faafetai. Tulai mai le sui usufono mo Aleipata Itupa i Luga.

**Tofa FAGAAIVALU KENRICK SAMU (Aleipata Itupa i Luga):** Faafetai atu i lau Afioga i le Fofoga Fatalai, faafetai foi mo le avanoa o lenei itumalo e taumafai atu ai se manatu puupuu e tusa ai foi o lenei Lipoti.

E muamua lava ona momoli le faafetai tele lava i le Taitaifono, aemaise foi o lenei Komiti e tusa o lenei Lipoti. Ae faamanuina foi le agaga faafetai ma le faamalo i le Faalapotopotoga o Felauaiga i le Laueelele e tusa ai foi ma galuega lelei, aua lava lo outou fitaituga, aua lava ia le saogalemu o le tatou atunu i femalagaiga i luga o le aualatele.

Ae lua nai fesili faamolemole e tauala atu i lau Afioga i le Minisita, ia o le matou auala lea e i Tiavea. Po o le a se tulaga o i ai e pei o la e lei faatinoina le galuega lea, o la ua i ai le auala le tumau, ae pe le mafai ona i ai ni nai faailoilo foi ia e tau atu ai i le mamalu o le atunu o lo o uia lea auala, e fai sina pio tu o le pioga, ona e maitauina, na i ai nai faalavelave na tupu po o le masina na tea atu nei, ona o i latou ia na aafia, e le masani tele i le auala, e pei o matou nei e ui ai i vайасо uma vайасо uma, ua masani i le auala lea e alu i tua. Ae na ona tatalo atu i lau Afioga ma le Pulega, sei avatu ni nai faailoilo ia sei faailoa atu ai i le mamalu o le atunu, e fai sina ogaoga ma faaletonu o le pioga lea i Tiavea, aua o la ua faaaoga le auala le tumau, ina ia faapena ona nofo uta ai i latou i le tulaga faaletonu o i ai ia le pioga.

Ma lona lua, po o fea foi se taimi o le a faataunuuina ai lea galuega, o lea e maitauina, pei lava foi o lea tafa o le atunu e fai sina tele o le atinae o tagata tafafao maimoa mai o lo o faapena ona i ai, pei o le toatele lava o i latou e uia le aualatele, e faale masani foi i le auala lea.

O lona o faafesili faamolemole e tauala atu pea i lau Afioga i le Minisita, le tulaga lea o fees e faaopoopo i luga o le totogi o taavale, pei o mea ia o late fees. Pei o le agaga sa fai ai le fuafuaga lea, o le tuai ona laisene o taavale mai lea masina...uaa pei ua foliga mai, ua tuu lava i masina ia le laiseneina o tatou taavale, a tuai la le laiseneina o lau taavale ia Mati, ia ona faaopoopo lea o le \$100.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

Ae pei o le agaga o lea e tau avatu ai se manatu, e pei o taavale ia ua faaletonu mo le savalia i le ono masina, aua a ono masina ua faaletonu maua le parts o le taavale ma faapipii ma toe avatu, a o la lava e totogi lava ia le late fee, ae pei o le agaga o le late fee, ina ia uunaia tagata taitoatasi e laisene a latou taavale i masina ua faapena ona tuu mai ai e le Faalapotopotoga. E le gata foi i lea o se faataitaiga taua tele, pei o nai faifeau ia e nonofo i fafo, a o lo o i ai a latou taavale i Samoa nei, e uma lava ona faaaaoga ia Me ona agai lea o latou i atunu mamaao, ae omai i le taimi o le Fono foi i Malua, ia ua faapena ona....Pe le o i ai se fuafuaga a le tatou Matagaluega, pe a pe a tai lua lava masina aua pei o le agaga moni lava ia o le late fee, ina ia uunaia tagata e laisene a latou taavale i masina ua faapena ona agavaa e laiseneina ai.

E pei na o le pau lea o nai faafesili, ma le faaaloalo lava faafetai.

**FOFOGA FETALAI:** Malo faafetai. O le a tuu atu le avanoa i le sui usufono mo Falelatai ma Samatau, ona faiiu mai lea e se tasi o sui usufono mo le Au Palota Taitoatasi, Afioga Maualaivao Pat Ah Him. Tulai mai le sui usufono mo Falelatai ma Samatau.

**Afioga TAEFU LEMI:** Malo faafetai i lau Afioga i le Fofoga Fatalai, e puupuu lava. E faafetai lava ua maua le avanoa e avatu ai ni nai manatu i le Lipoti.

Lau Afioga i le Fofoga Fatalai, o le magatolu lea e i tua ane o le lotoa Vaai i le alu atu lea i i i Fugalei e ea i o i le GST i Taufusi, o le magatolu lena e tatau lava ona toe faalelei ia maka lea e alu i luga o le auala, sa ou vaai sa toe fai talu ai nei le isi laina solid line i luga o le magatolu lea, e lei iloga lava ona lelei ona fai, ave ifo se vali faamolemole e vali ai laina e tou te finagalo e le toe faaaogaina. O le faalavelave ona o la e i ai laina tuai, ia toe tuu atu ai ma le laina fou e le umi lava ae lanu faatasi ua tuai faatasi uma ai lava.

Lau Afioga i le Fofoga Fatalai e malie saunoaga a nisi o sui usufono, fai se polokalame faalauiloa ia malamalama uma avetaavale i le tulafono, aemaise o le afega i lea magaala ma lea magaala, faamolemole tuu i ai ma le round about lea e i o i Togafuafua i le faalauiloa lena leaga e i ai foi avetaavale e ta te vaai e faale usitaia ia tulafono pe a oo i le round about.

Sa saunoa nisi o sui usufono i le kolosi lea i le alu i i i le mea sa i ai le faleoloa tuai o le Ofisa o Faatoaga agai i o i le NPF Plaza, ia o lau tatalo, se faamolemole fai ni moli e kolosi ai. O lau lea tatalo lau Afioga i le Fofoga Fatalai, fai ni moli e kolosi ai, oomi le moli ona kolosi loa lea, a taunu i le isi itu toe ola mai le moli lea e o ai taavale. O le mea lea e i ai nei, a oo ina tumutumu le taulaga ma pisi, ta te fiu lava e tu le taavale ae kolosi atu lava, faifai atu ai lava le solo umi a le au kolosi. O le talosaga lea lau Afioga i le Fofoga Fatalai. A fai ni moli, ona i ai lava lea o le taimi e tu ai le o lo o kolosi ae sei o taavale.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueleele mo le Tausaga 2009/2010 – Iloiloga**

Ma le fesili sili ona taua na ou fia tulai atu ai, o lou fia fesiligia lea o le Taitaifono ma le Komiti foi lea, e fia le umi e tipi ai le auala sei fai le paipa foi lea e kolosi i le auala? E fia le umi ona faatoa faata loa lea? O le fesili lea. A faapea e tolu masina, ona toe faafoi mai lea o lau fesili aua ou te masalo ua lata ina toe o atu le Ofisa o le LTA e fai, aua leaga o le kolosi lea ei luma ae o le falesa Katoliko i Siufaga Falelatai, ua tolu masina, ae lei faia lava. Faamolemole lau Afioga i le Taitaifono ua ta le maua foi le Tulafono pe fia le umi e fai ai le kolosi lea e tipi ai le auala ona faatoa o atu foi lea o le LTA po o konekarate e nafa ma le faaleleia o lea vaega.

E pei o nai manatu ia lau Afioga i le Fofoga Fatalai. Toe pau lava lea lau Afioga i le Fofoga Fatalai, o le alu lea i Falelatai, a oo, ta te iloagofie lava mea sa kolosi ai le paipa, leaga foi e ui lava ua uma ona faata, ae omo lava. O lona uiga e silasila i le faatinoga o le faataina o vaega ia, ina ia maua lava le auala i le mea sa i ai ma ia aua foi nei umi ona omo lea. Ma le faaaloalo lava.

**FOFOGA FETALAI:** Malo. O le avanoa mulimuli ona tuu atu ai lea o le avanoa i le.....

**Afioga MAUALAIVAO PAT AH HIM:** Faafetai i lau Afioga i le Fofoga Fatalai. Ou te tulai atu ma le faaaloalo, o le a taumafai e aloaloese i se fautuaga ua uma ona saunoa i ai nisi sui usufono. Ae ua ou tulai atu ma le faaaloalo, e faafetai foi, e manaia lava, a anoa lava fautuaga a Komiti, e ese le manaia, e matala ai foi lagona. Ma ou te fia tautala i nai fautuaga e uiga i le saogalemu o tatou auala tetele. I lau maitau i patupatu nei e saunoa soo i ai sui usufono, o le alu atu lea i Malifa e tau i le malae vaalele, e 34 le aofai o patupatu. O lau maitau i ai ua aveese pe fa ni patupatu ua aveese, lona uiga ua totoe le 30. Sei silasila i ai lau Afioga i le Minisita pe le ono aveese nisi patupatu., O le patupatu sili lava ona leaga o le patupatu lea e i Malie. Ta te faalogo i ai, sa inisinia e le sui usufono o lea itumalo, o le matua faaletonu lava o le patupatu lea i le tu lelei o le taavale ae faapena ona... ou te talitonu i ai, ua tele tele nei patupatu, ae faafetai o lea ua amata ona ou vaaia ua aveese.

O le isi au fautuaga i le eliina o auala, o lau vaai i auala pe a eli nei i le mea e faataoto ai paipa ma mea faapena, lau Afioga i le Fofoga Fatalai, o le tele ia o le reserve o le auala agai i autafa, ae ou te le iloa pe mafua mai i inisinia. A eli lava mea nei vaeatu le mamalu o lau Afioga i le Fofoga Fatalai, e eli lava, e toe faaleaga ai lava le auala, e ui lava ina toe leaga ai le ta fou ma mea faapena, ae o la e tele lava le reserve i autafa ou te molimau atu ai o lo o tupu i le taimi lenei sa ou matamata i ai. Po o le a le mea e le tuutuu ai i tua ae faasao. E lua la mea e tupu, o le faaleaga o le auala, toe vaiti ma le auala, ioe, a o le mea sili ona leaga, o le le toe tanutanua lelei.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

Pe le mafai ona silasila i ai le Afioga i le Minisita ma le Matagaluega i fuafuaga nei e faataoto aua le faasaoina o tupe maumau a si o tatou atunuu.

O se fautuaga mo taavale nei e feoai, aemaise lava o le night vision i le po, ua maitauina le tele o taavale, a le tasi le moli, ua malosi le moli o le isi itu ae vaivai le isi itu. E te fiu e taumafai se mea e te agai mai ai i mea nei sei silasila le au pasi taavale pe faapefea ona... e tatau lava ona tutusa le malolosi o moli. Masalo lava e molimau le Maota lenei e leai se isi o tatou e le fealuai i afiafi, o le mea lava lena o lea e feagai ma tatou. O le isi foi mea o le laina lea e maka i le ogatotonu, a oo i timuga i le po, a le lelei le laina lea, o le laina lava lea e guide ai ta ita pe a fetaui ma ituaiga taavale faapenei e le o paleni le susulu o moli. E fautua atu ai ma le faaaloalo, tasi lea faafitauli.

O le isi faafitauli i luga o le auala, o mea nei o taavale e breakdown i luga o auala. A breakdown le taavale pe pa foi le pau vaeatu lau Afioga i le Fofoga Fetalai, e fai ai lava i ina. A o la e i ai tatou tow-car, tow-truck e faaaoga le auaunaga lea, ina ia saogalemu. O le le saogalemu la o taavale e feoai i aualatele, a o lea e maitauina pea, e alu alu lava tau atu i se taavale ua manua mai le auala, e faapena lava ona togafitia ai i luga o le auala, ae pei o lata ita vaai, e pei e le talafeagai.

O le fautuaga mulimuli i tatou auala, manaia le faatinoina o auala fou nei e fai nei. E i ai foi nisi vaega o le auala ua fai si leva o i ai, ae o le mea o lo o maitauina, faamolemole o mea nei o manhole, e tai pei... E i ai manhole e oo ma ii le taimi lenei pei o Tufuiopa i le sau lea i gauta i le magafa mai le falemai sau i Tufuiopa, e i ai le magatolu lea e sau tau mai i Togafuafua, o i ina tonu lava, o lo o i ai le manhole lea. E manaia le malosi o le manhole, a o le faalavelave, masalo pe sefulu inisi le omo lea e i lalo o le manhole e aloalo ai lava lau pau. O i ina atonu toeitiiti lava tupu ai se faalavelave.

O le fautuaga mulimuli e faaopoopo atu i lau Afioga i le Fofoga Fetalai, o mea nei o faailoilo, o le taua ia o faailoilo. O le auala lea i Lelata i le agai atu i le aega i le alu i Faatoia ma le alu i gauta i Magiagi, faamolemole lau Afioga i le Fofoga Fetalai, e fautua atu pe mafai ona fai ni faailoilo i ina, o le faigata ia ona taofiofio o le sao i i. E lagona le masalosalo i mea nei o le leai o ni faailoilo pe i ai ni stop ma ni laina e limataitaiina ai ma faatonutonu ai taavale.

E i ai le mea na tupu i le lua tausaga talu ai, e i ai lau uo sa sau mai fafo i le magafa lea e i Saleufi road lea e fau ai le maketi fou. O i ina la, e leai ni laina e sau le taavale tu ai, ae lei faia foi ni moli i le taimi lena, masalo po o le lua i le tolu tausaga. Sau lava le taavale vaeatu foi lava, a le tamaloa lea mai Niu Sila alu, fetaui loa ma le taavale, ieo, sau loa le leoleo.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

Na faapea le manatu o le tamaloa lea, ai e alu loa le taavale, aua e leai se laina e taofi ai le taavale ma tu. Fai atu le leoleo, “o le a le mea ua tupu?” Se o lou manatu e alu sao lau taavale leaga o lea e leai se laina. Ae fai mai le leoleo, “Aua e te fiapoto.” O lona uiga, e faapena le mea e tupu pe a faapea e leai ni faalauiloa faapea mo le saogalemu. Ma le faaaloalo. Faafetai.

**FOFOGA FETALAI:** Malo. Ia ona o lo o manatu o lo o toatele nisi o sui usufono o lo o fia maua ni avanoa. O le a tulai atu pea la ma avatu pea la avanoa. Tulai mai se tasi o sui usufono mo Vaimauga Sisifo, Tofa Lenatai Victor Faafoi Tamapua ma le sui usufono mo Aiga i le Tai.

**Tofa LENATAI VICTOR FAAFOI TAMAPUA (Vaimauga Sisifo):** Faafetai mo le avanoa. E fia faamauina foi le agaga faafetai o lou nei tagata i le Afioaga i le Minisita mo Galuega, Felauaiga ma Atinae Eseese aemaise foi le Pulega o le LTA e tusa ai foi ma le patupatu o lea ua fausia i le auala lea i Magiagi agai i Vaivasetai, i luma tonu o le fanuatanu. O lea sa talosagaina i le isi a tatou Fonotaga talu ai. E momoli atu ai le agaga faafetai aua le saogalemu o avetaavale, aemaise foi o tamaiti aoga, faapea foi le mamalu o le atunu o lo o faaaogaina auala savali o lo o i autafa ane o le aualatele.

E momoli foi le agaga faafetai i le toe faaleleia lea o le auala lea agai atu i le Apia Park faasolo atu i Moataa, ona o lea auala, e le na o tagata Moataa o lo o faaaogaina. E pei ona silafia o lea auala e aoga uma mo e e agai atu i sasae ma le toe afifio mai i Apia. Ae manaia tele pe ana o faatasi ma le fausia o ni auala savali ona o le auala savali lea e alu atu gata i le Apia Park, ona leai atu lea i Moataa, ae alu atu toe maua le auala savali lea e i le magatolu lea e tuaoi ma Fagalii, lea e agai atu i uta i le Kolisi o Samoa. Ma le faaaloalo lava. Faafetai.

**FOFOGA FETALAI:** Malo. O le agaga o le faafetai lea e te lua fia tulai mai ai le sui usufono mo Aiga i le Tai ma le sui usufono mo Faasaleleaga Nu.4? Ia, leaga o lea e faagaso le tatou galuega.

Tulai mai le sui usufono mo Aiga i le Tai.

**Susuga IFOPO MATIA FILISI (Aiga i le Tai):** Faafetai lava mo le avanoa i lau Afioaga i le Fofoga Fetalai. Ua ou tulai atu ma le faaaloalo e momoli le faafetai tele i le Taitaifono o le Komiti faapea foi le mamalu o sui usufono o le Komiti. O lea e maitau lava, faafetai foi mo sui usufono lea e i totonu o le Komiti lea a o lea na sausaunoa muamua, a o lea ua maua le avanoa.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

O le fautuaga, e fia avatu pea i le Matagaluega ona o lenei foi fautuaga e le faapea faatoa ou lauga ai lea. E leai, ou te iloa po o le faalima ai lea, i lau Afioga i le Minisita faapea foi le Pule Sili, ina ia manatua pea le tatou uafu la e i Mulifanua, lea ta te tatalo atu pea i le auala lea mo le faagasologa o taavale i le vaa, o la e lava e tasi le itu pe a oo atu i le uafu i Mulifanua tatou taavale i le agai i Falelatai, ona e lei faia lava se tatou auala e agai sao ai taavale i le vaa. O le manumanuga lava, e lelei le puipuia i lo le togafitia.

O le isi mataupu ou te toe fia tauina atu, e tatau ona fai se tatou faailoilo po o faailoga lea, ae ou te iloa lava o lea e agai atu i ai, ae ou te iloa pei o le a fai si umi e le o faia lava a o le mea e tatau ona ave i ai le faamuamua.

O le auala lea i le alu i Falelatai ma le uafu ma le agai mai i le malae vaalele, o le matua tele lava o taavale o lo o tau lavevea ai, ma ua leai lava foi ma se fale faatali pasese o i ai ua uma ona tasoa uma i lalo e taavale i ina. O le mafuaaga lena.

Ou te tatalo atu foi faamolemole mo se fautuaga i le tatou Komiti, faamolemole o loli foi nei lau palapala, lau maa, lau oneone, ioe, e masaa atu lava uta i le auala o la e mulimuli mai isi taavale. Po o le a se tatou tulafono ua fai i ai.

O le agaga lea lau Afioga i le Fofoga Fatalai. Ma le faaaloalo lava. Faafetai.

**FOFOGA FETALAI:** Malo. Tulai mai le sui usufono mo Faasaleleaga Nu.4.

**Afioga PESETA VAIFOU TEVAGA (Faasaleleaga Nu.4):** Faafetai mo le avanoa i lau Afioga i le Fofoga Fatalai. Ia atonu o lea ua faafogaga foi le Palemene i le tele foi o saunoaga a sui usufono mamalu. Ia leaga o au ou te i totonus o le Komiti lenei, leai e ese foi se matou foi tuualalo atu ona o se tulaga i le auala lea mo le puipuiga o le saogalemu i Vaitele. Na ona faamanatu atu lava i lau Afioga i le Minisita ma le Matagaluega, ona o le vaiaso lea na tea nei sa ou agai atu ai i le itu lea, le auala lea e alu atu i le maketi fou i Vaitele agai i uta, talaaatu o le mea lea e i ai le vilimaa a OTT. Sa ou tu i ina ma ou matamata i le eliina o le alavai fou lena e i ina, masalo toe lava o le oneone lou tino ma lou ulu pe a ou tu i totonus i le loloto o lea ituaiga alavai. Ou te le iloa le konekarate lea na ona fautua atu lava lau Afioga sei silasila ane i ai, a mea e aua le eli atu lava ma shoulder o le auala.

O se talosaga lea sei silasila ifo lava lau Afioga ma le Pulega, ina nei mea ua lavea se taavale, e le gata i le matua le aoga o le taavale, a o se faalavelave foi e tulai mai. Ma lou faaaloalo lava.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

**FOFOGA FETALAI:** Ia, o le a avatu le avanoa muamua i le Sui Fofoga Fatalai ona lafo atu lea.

**Tofa AGAFILI PATISELA ETEUATI TOLOVAA:** Faafetai mo le avanoa i lau Afioga i le Fofoga Fatalai. E fia faaleoina foi le agaga faafetai i le Komiti faapea le Taitaifono e tusa ai ma lenei Lipoti matagofie. E moni lava ua tuanai nei tausaga, ae ua maua foi lenei avanoa e molimoli atu ai ni lagona e tusa ai foi ma taualumaga o le Matagaluega i lenei vaitau.

E muamua ona ou faafetai atu i lau Afioga i le Minisita faapea le Matagaluega e tusa ai ma le auala o le matou nuu i Salailua, o lea ua faafofoga i ai i le saunoaga autu a le Afioga i le Palemia, silasila foi i le auala, ae faafetai tele mo le auala i Salailua.

O patupatu ia e i Savaii, ai lava o patupatu nei e aupito sili le lelei ona fausia. O Savaii atoa lava e leai ma se patupatu o faafitauli i ni taavale, e lautetele ma e talafeagai mo le femalagaai o taavale. A i ai se finagalo e aveese nisi patupatu, ua lelei o la ua i ai isi patupatu ua aveese, a o le fautuaga i le Pulega, a ua aveese patupatu ona aveese lea ma faailoilo foi ia e tutu i autafa e faailoa mai ai le patupatu. Aua o isi taimi ta te alu atu ta te le iloaina ua avaeese le patupatu e le gata i Savaii a o Upolu nei. Ona o ta faalemu atu lava lea, ta te fiu e autilo le patupatu, ta te pasi lava ae ua leva ona aveese le patupatu. Ona o lea ta te mulimilitai i le faailoilo lea e i autafa o le auala ae ua le o toe i ai se patupatu.

Lau Afioga i le Minisita faapea le Pulega, e vaai lava ma le alofa i toniga ia e faaaoga e leoleo auala a le LTA. Ou te iloa e leai lava se isi o outou e le o silasila i ai, ua matua matafi lava. Po o le a se finagalo ae ua tatau ona faafou toniga a le LTA ona o tagata na o lea e tau muamua i ai le silasila a tagata mai fafo ma le feoai a le atunu i lea aso ma lea aso, a o le toniga le la e faaaoga i le taimi lenei, ou te iloa ua tatau ona fai se isi toniga fou a le LTA pe a talafeagai ai ma fuafuaga tau tupe a lau Afioga i le Minisita.

Ua faatiga taliga foi i lau Afioga i le Minisita le mataupu lava lea ou te laga pea i mea nei o loli lau uta. E le i mamaao atu nei na faaletonu ai le isi loli i luma tonu lava o lou pale. Ua maotua tele le alu a le loli a o la e timu ona goto loa lea o pau i le itu agavale, ae mau pau ia o le itu taumatau i luga o le auala. E aso atoa o taumafai e aveese, ae na ona goto lava o le itu agavale sipa loa ma le uta, a o le uta e maualalo le tali uta ae ese le maualuga o le tali uta. Na ona tuu atu i tafatatafa o lau Afioga i le Minisita po o le a se silasila i ai a le Pulega i lea tulaga i loli aua e pei foi ona laga e nisi o sui usufono. E i ai faafitauli e tutupu mai ona ua aveese mea ia e i tua o pusa o loli lea e tali ai uta.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

E i ai le auala lea e i Falelauniu ua leva ona uma ona sua lau Afioga i le Minisita. O le taimi lenei o lea ua mugala ua malosi tele le pefu, a o le Lipoti e faafetai atu i lau Afioga i le Taitaifono, faafetai foi i le Pulega e tusa ai ma galuega faatino, faafetai.

**FOFOGA FETALAI:** Malo faafetai saunoa lau Afioga i le sui usufono mamalu. O le a avatu le avanoa mulimuli i lea Itu o le Maota i le sui usufono mo Vaisigano Nu.1 ma le sui usufono mo Anoamoa Sasae.

**Afioga TUFGA GAFOALEATA FAITUA (Vaisigano Nu.1):** Faafetai i lau Afioga i le Fofoga Fatalai mo le avanoa, e faafetai foi i le Taitaifono o le Komiti mo Galuega, Felauaiga ma Siosiomaga mo le Lipoti a le Pulega o Felauaiga i Luga o le Laueelele.

O le fautuaga lau Afioga i le Fofoga Fatalai i le faalauteleina o o tatou auala. Ua matauina pea le poloka o auala i le agai mai lea i Lelata pe a uma ona tuu tamaiti aoga i le Iunivesite ma le Kolisi o Samoa. O le agaga faamolemole lau Afioga i le Minisita, i le toe foi mai i le auala lea agai i le magatolu lea i le sau mai Vailima, e poloka lava le toe foi mai o le aufaigaluega a le Malo pe a maea ona tuu alo ma fanau i aoga nei. Ua matauina le poloka e mafua i le tasi o le laina e poloka ai autafa o le fale o le Faamasino Sili. O le tuualalo lau Afioga i le Fofoga Fatalai, a mafai ona faalautele i ina ia lua mai ni lane ia sau ai le auala agai i Apia ma le alu i uta i Vailima, o i ina o le a televave ai ma foia ai le poloka lea. Aua o lea e le iloa se tausaga e toe fai ai le ala laupapa lea i Vaisigano, ae a vave i ina e vave foi ona foia le poloka lea i taeao ma le taimi e toe pikai alo ma fanau i le maea ai o aoga.

Ua uma foi ona tuuina atu le talosaga i lau Afioga i le Minisita i le toe faalauteleina o le auala o lenei nuu i Asau ona ua matua vaiti ma e lamatia ai le soifua pe a oo ina pisi atu taavale i Matavai faapea foi le ui atu i Utuloa. Ua uma ona tuu atu le talosaga tusitusia, ae e toe tuu atu pea ona o lea ua ala atu i inei le talaosaga i le Lipoti a le Komiti.

Faafetai i lau Afioga i le Fofoga Fatalai mo le avanoa.

**FOFOGA FETALAI:** Malo faafetai. O le avanoa mulimuli, tulai mai le sui usufono mo Anoamoa Sasae.

**Tofa ALO FULIFULI TAVEUVEU (Anoamoa Sasae):** E faafetai atu mo le avanoa lau Afioga i le Fofoga Fatalai ma e puupuu lava se talosaga.

O le tulaga lea e pei foi ona taua, e tele taavale e ova mai le paka i tafatafa o auala. E talosaga atu ona e tele lava le faalavelave o ia tulaga aua o nisi lava o taavale nei, faatoa alu ese lava le taavale mai le po atoa i le 10.00 i le taeao, ae tutu ai lava i tafatafa o le auala e paka ai a o lea e femalagaai taavale a le atunuu.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueleele mo le Tausaga 2009/2010 – Iloiloga**

O lona lua, e i ai le niu ma ou te le iloa pe talafeagai ona avatu i lenei taimi. E i ai le niu lea e falala i le vaega lea o Luatuanuu lea e afio mai ai le Afioga i le Sui Palemia. O le niu ua leva lava ona ou fia alu i luga i le mauga e tattuu mai i lalo pe tulei mai foi i lalo le niu ona e falala tonu lava i luga o le auala. Masalo na amata mai i le taimi o le afa lea na i ai, e oo mai i le taimi lenei o la e falala ai lava e ova mai i le isi itu o le auala le falala i luga o le niu. O le matua faaletonu lava ma so o se taimi lava ou te alu atu ai e muamua lava tau lau vaai, toeitiiti lava faaletonu ai se taavale. Po o ai le vaega e fesoasoani i lea itu, po o le Matagaluega o Galuega po o le Pulega lea o Felauaiga i luga o le Laueleele leaga o lea e aafia ai luga o le auala ina ia fesoasoani mo le saogalemu o le fegasoloai o o tatou tagata. Ma le faaaloalo, faafetai.

**FOFOGA FETALAI:** Malo; faafetai fesoasoani mai.

**Afioga Hon Leaupepe Toleafoa Apulu Faafisi:** Lau Afioga i le Fofoga Fetalai e fia maua sina avanoa.

**FOFOGA FETALAI:** O le a e fesoasoani i le niu lea Toleafoa?

**Afioga Hon Leaupepe Toleafoa Apulu Faafisi:** O lea lava lau Afioga i le Fofoga Fetalai. Ona o au o le Luatuanuu aua masalo o le afioaga tonu lea o lea e saunoa i ai le sui usufono.

O le niu lea o le niu faasao, ae a silasila i ai le sui usufono, e loka lelei lava i luga le ponati niu e le afioaga lea, ae ua lelei foi le fautuaga se i talanoa pea i le aiga e ana le niu po o ua mausali loka o le niu. Afai ua mausali o le a le afaina e leai se mea e popole ai le sui usufono, ae afai e faaletonu ua tatau ona aveese. Ma le faaaloalo lava.

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai.....

**FOFOGA FETALAI:** Se i tulai atu la le tama o le itumalo pe afai o lea.

**Tofa Hon Fonotoe Nuafesili Pierre Lauofo:** Ua ou tulai atu ona o au e ana le niu ma o lea ua ou faailoa atu ma le ava tele, ua matua mausali lava loka o le niu, e le pau le niu ma ua fiu afa e tele e le pau, ae faafetai o lea ua taoto mai le ofo a lou uso a sui usufono mo Anoamaa Sasae. O se taimi ona ta o lea se i o ta vaavaai i ai po o le a se fuafuaga o le a fai i ai, ae faafetai le faamanatu mai.

**FOFOGA FETALAI:** Leaga e i ai pou moli ia e touulu foi i luga o taavale i se mea o Vaivase lea foi na tupu ai le faalavelave, ae faafetai i le sui usufono, faafetai le faamanatu mai.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

Tulai mai lau Afioga i le Taitafono ona tuu atu ai lea o le avanoa i le Minisita pe a i ai se mea e fia saunoa faaopoopo ai.

**Tofa TUSA MISI TUPUOLA:** Faafetai i lau Afioga i le Fofoga Fetalai, e momoli atu foi le faafetai tele i sui usufono sa sausaunoa e tusa ai ma le Lipoti a le Pulega o Felauaiga i Luga o le Laueelele. Ma le faaalalo lau Afioga i le Fofoga Fetalai, ou te tali atu lava i mea na talanoa i ai le Komiti, a o isi la mea e pei o faiga faavae ma isi talosaga fou o auala ma isi mea faapena, o le a lafo atu pea i le Afioga i le Minisita mo lana saunoaga e faaiu ai le matou Lipoti.

O le tulaga lea i a tatou humps e pei ona saunoa i ai le sui usufono mo Faleata Sisifo, o lea e pei ona avatu i le Lipoti o lea ua taumafai ina ia aveese le tele o humps e tusa foi o fuafuaga lea e pei ona maua i le Lipoti a le Komiti.

O le taimi nei la o lo o tumau pea isi a tatou patupatu ona o le tulaga i le silasila a le Matagaluega faapea foi le Pulega i le saogalemu o alo ma fanau aoga aemaise o nisi o Eklesia e tu lalata i le auala, o le ala lena o lo o tuai ai ona aveese isi a tatou patupatu ia, a o le agaga lava ia o lea ua maea e pei ona avatu i le Lipoti lau Afioga i le Fofoga Fetalai ina ia aveese le tele o patupatu.

O le tulaga lea i le kolosi lea i luma o le Plaza e pei ona sa fesiligia foi e le Komiti, e pei lava ona silafia e lo tatou Maota ua tele tausaga o taumafai le Pulega aemaise foi le Matagaluega o Leoleo i le taumafaiga o se auala e puipui ai le kolosi sese o le atunuua aemaise lava o pasi ia e omai i le maketi. E pei o i ina tonu lava lea e mafua ai. Sa taumafai foi e fai se pa, a o le faafitauli foi, o lona uiga e mafai ona tilotilo i le tele o se aafiaga i se pa faapena pe a fai i totonu i le mea o lo o i ai kamupani ma faleoloa aemaise o le maketi. O le tulaga lena o lo o silasila pea i ai le Pulega i le tulaga i le kolosi lea. O le taimi nei o la ua i ai le faailoilo ma o lena foi o lo o i ai leoleo ma le vaega a le LTA po o le Pulega o Felauaiga mo le faamalosia o le Tulafono.

O mea ia o faailoilo lau Afioga i le Fofoga Fetalai, o lo o faagasolo lava le polokalame a le Pulega i le faiga o faailoilo i luga o le aualatele. O lena ua outou silasila i le faasolo i le Malae Vaalele ma le agai i Falealili, Lefaga faapea foi Aleipata, o lo o taumafai lava e tulimatai tulaga e tatau ona tutu ai a tatou faailoilo, a o le tele foi o isi a tatou faailoilo e pei ona silasila i ai a outou Afioga, e faaleaga lava. E pei e faaleaga lava e le toatele o nisi latou te le o lagona le taua o faailoilo, a o faailoilo nei e pei lava ona silafia, o taiala nei mo avetaavale ina ia mafai ai ona maua pea le saogalemu o femalagaaiga i luga o aualatetele.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

O le tulaga i a tatou polokalame ia e pei ona saunoa i ai sui usufono mamalu, o lo o faatino pea polokalame faale-aoaoga o le saogalemu i luga o aualatetele. E le gata ina taumafai e faailoa suiga fou aemaise le suiga o le itu auala mai le taimi lea seia oo mai i le taimi nei, o lo o faatino pea e le Matagaluega faatasi ma le fesoasoani a le Matagaluega a Leoleo i le taumafai o a tatou polokalame faale-aoaoga ina ia mafai pea ona toe aotauina alii ma tamaitai avetaavale ina ia latou silafia lelei le tulaga i le faatulagaga o Tulafono e puipuia ai mai le tele o faalavelave. E oo foi la i mea ia o lanes, o lo o i ai foi le latou polokalame lea mo le faagaoioiga o le faasaoga o le faaaaogaina o lanes e tusa ma le latou Tulafono lea na pasia talu ai, e leai se suiga o le latou Tulafono o i ai. O lena lava e malamalama i le faagasologa o ‘āū lau Afioga i le Fofoga Fetalai ma le mamalu o le Maota i le tulaga e agai i ai. E te silafia lelei lava le ave taavale e leai se laisene ave taavale, o le ave taavale lena e le o malamalama i le faaaaogaina o ‘āū, o magaala ma lanes, ae manaomia lava i latou na e tatau ona tuuina atu i le Matagaluega o Leoleo aemaise foi sui o le Pulega o Felauaiga i luga o le Laueelele mo le moliaina o i latou ma tuuina atu i le faamasinoga.

O le mea na saunoa ai se tasi o sui usufono mo le Au Palota Taitoatasi, Susuga Hon Papaliitele Niko Lee Hang i car dealer plate lau Afioga i le Fofoga Fetalai. Sa fesiligia e le Komiti le tulaga lea, a o le mea ua aliali mai o le dealer plate e faatau e le tagata e fai lana car dealer ma o i latou ia e faatauina taavale lea e aumaia taavale mai fafo ma faatau i le atunu. O le aoga la o le numera lea e ave e aumai ai a latou taavale fou mai le uafu i le fale lea e faatau ai taavale. Ona pau lava lea o le aoga o le numera lea, na o le aumaiga o le taavale lea e le i laiseneina mai le uafu i le latou dealer po o le latou kamupani, ona toe aveese ai lea o le plate e le faaaaogaina. A o le faalavelave o le mea lea na molimauna mai, o le tele o isi taavale ua aumai e kamupani faatau taavale, ua faatau taavale i tagata o le atunu ma avatu ai ma le dealer plate. O lona uiga la ua avatu le dealer plate ae ua le mafai ona ave e laisene ma le maua ai isi tupe a le Pulega, a o le solitulafono le mea lea lau Afioga i le Fofoga Fetalai. O le ala lena o lea sa aumai ai le iuga a le Komiti o pasi ma taxi, ona pau lea o le mea e oo i ai le malosi o le Tulafono a le Pulega o Felauaiga i luga o le Laueelele e sa se pasi e tint, e sa foi se taxi e tint, a o private vehicle lau Afioga i le Fofoga Fetalai e le o i ai se Tulafono e faasaina ai, a o lo o faamalosia pea lava e le Pulega o Felauaiga e tusa o le faamatalaga a le Pule Sili ma le Pulega faitotoa, a o luma i le wind screen e sa. E le mafai ona faatagaina i le private vehicle, vagana lava faitotoa o la e faataga e pule le tagata e ana lana taavale i le faaaaogaina o lana private plate.

E pei ona saunoa le sui usufono mamalu, ia vagana ua i ai se isi Tulafono i le lumanai ona mafai lea ona toe silasila i ai le Pulega mo le faaaaogaina.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

**FOFOGA FETALAI:** Malie lau Afioga i le Taitaifono, sei tuu atu le avanoa i le faauilavea a le sui usufono mamalu.

**Susuga Hon Papaliitele Niko Lee Hang:** E faamalie atu foi i lau Afioga i le Taitaifono ona e le fia faalavelaveina lau folasaga matagofie.

Ae ua ou toe tulai ma le faaaloalo lau Afioga i le Fofoga Fetalai, ona sa ou taua mea ia o faiga faavae a le Malo. Ma sa agai lava lau faamatalaga i taavale a le Malo, ae o lea ou te malamalamā i le Tulafono lea i taxis ma pasi, ae pe sa agai lau fautuaga sei silasila ane le Pulega i faiga faavae la a le Malo i taavale a le Malo, o lo o manino mai ai le tulaga lea e le tatau ona tint taavale a le Malo, aemaise foi la laisene a le Malo, o lo o i lalo foi o le faiga faavae lea, o taavale uma lava a le Malo, e tatau ona laisene i plates a le Malo. Ma le faaaloalo lava.

**FOFOGA FETALAI:** Malo. Ia tulai mai le Taitaifono e talifuaitau.

**Tofa TUSA MISI TUPUOLA:** Faafetai i le sui usufono mamalu, masalo o lea ua faafofoga mai le Afioga i le Minisita, ia ae tuuina atu i ai le mataupu lea o taavale a le Malo, a o taavale lea ou te talanoa atu ai, ia o le mea lena o lea e i le Lipoti o pasi ma taxi, ma private vehicles. Ia ae ua lelei faafetai i lau Afioga mo le faamanatu pea.

O le tulaga na saunoa ai le sui usufono mo Siumu, ia e sao lelei le Afioga i le sui usufono, leaga o maua e o uma i Falealili ma Safata, Siumu, o tulaga ia o loli tetele ia e taua, ia e moni lelei lava le saunoaga, a o lo o i ai pea le tulaga o faatinoga o galuega nei e faaaoga i ai loli ma masini, ia so o se mea lava e malaga ai taavale nei e tatau lava ona o soso i tua ma le auala, aua latou te iloa o latou e fai sina lapopoa o taavale, ia a o le mea lava lea e tupu, ia o lona uiga pe le o lelei foi le mafaufau o le ave loli i lena taimi ia po o ave masini, e mafua ai ona tau tutu i lane ma poloka ai le auala i le agai i Tiavi, ma le agai atu i Falealili, Siumu ma Safata.

O le mataupu lau Afioga pei ona saunoa i ai le Afioga i le sui usufono mo Sagaga le Usoga mea o label o taxi ia, e moni lava o le tulaga fou lena o lea ua faaaogaina nei e le Pulega mo le taumafai ia identify ia taxi mai le tele o mea foi nei e galo i totonu o taavale a le atunu. O lenei la ua outou silasila foi le mamalu o le Palestene i lenei itula, ia ua matua manaia le tulaga ua i ai ia faailoilo ia mo taxi, o la foi ua ou fesili atu i le Pulega i taimi o le suesuega a le Komiti, ia ua taumafai e fai le ID card o ave taxi, ina ia oo atu i le taimi o le SIDS, ia ua tofu i latou ma IDs mo le faaaogaina e o tatou tagata tafafao maimoa mai ma tagata o le a malaga mai, ina ia faigofie ona maua ai le au ulavavale ia e over charged i totonu i le faatinoga o a latou taavale afi, taavale ia o taxi.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

O le tulaga ia o mea o give way pei ona saunoa le sui usufono mamalu. O lea foi faatoa maea le tatou Tulafono fou atonu lava o tatou lea faatoa amata, e fua foi le tatou fuafuaga o tatou tulafono i le tulaga o le tele o taavale afi e feoai i luga o le aualatele, ia e moni lava, e tatau lava ona tatou agai i luma, ae sei o tatou talia le isi Lipoti a le Pulega ia ona mafai ai lea ona faatino isi fuafuaga fou mo le agai i luma pei ona aumai e a outou Afioga i sui usufono mamalu.

O patupatu ia i Savaii, ou te masalo o patupatu aupito sili ia ona manaia ma le taua pei ona faafofoga foi i isi sui usufono mamalu, nai lo i isi a tatou patupatu i Upolu ua fai sina maualuluga tele, ia a o le agaga lava lena pei ona taumafai atu, o lo o ua taumafai le tatou Pulega ina ia faaititia ia ma toe faaleleia, ia ma toe valivali, ma toe polesi tulaga uma o tatou patupatu ia, ina ia aua ne i i ai se faletonu, aemaise foi o le saogalemu o alo ma fanau ma taavale feoai i luga o tatou aualatetele.

Ou te faafetai foi i le Afioga i le sui usufono mamalu mo Aleipata Itupa i Lalo, i le tulaga pei ona ia aumai i tulaga ia o patupatu, aemaise foi o Lufilufi ma Faleapuna, ia o le agaga lava lea pei ona ou tautala atu lau Afioga i le Fofoga Fatalai ma le mamalu o le Palemene, ia o lo o faagasolo atu pea i ai fuafuaga a le Pulega pei ona talanoaina i le latou Lipoti.

O le tulaga ia o mea o slow moving vehicles i luga o le auala, ou te iloa o la e i ai le tulafono e mafai ona molia ai le tele o isi taavale e o lemu i luga o le auala ma le faaaogaina o lane sese, ia ou te iloa la o la o lo o silafia pea e latou o lo o faamalosia le tulafono, pei o le Matagaluega o Leoleo ma Falepuipui, aemaise foi le vaega lea o authorise traffic offices a le Lands Transport Authority.

O le mataupu lea na saunoa ai le sui usufono mo Aleipata Itupa i Luga o lona auala, ia ma le late fees, ia e moni lava le saunoaga a le sui usufono mamalu, ia o le late fee na faatino mai lava pei uma lava o le 2009, 2010 e oo mai lava i le taimi nei ona o le taumafaiga ina ia puipuia mai le feoai o taavale afi e le laiseneina i luga o le aualatele, aemaise lava i pasi ma mea ia o taxi. O lea la ua oo mai i le taimi nei o lo o faaaogaina pea, a o lo o tatou vaavaai atu lava i le taua tele o le late fee, e le o le tupe e taua lau Afioga ma le mamalu o le Palemene, a o le taua o le latou iloa o le saogalemu o latou taavale e feoai i luga o aualatetele, e ao la ona laisene, o lona uiga a tuai loa ona laisene, aua o la ua tofu lava le tagata ia ma lana aso e laisene ma le masina, ia ua faafraigofie ai lava le tulaga o le tatou galuega.

O le Afioga i le sui usufono mo Falelatai ma Samatau pei ona ia....ia o mea ia o roundabouts, o lena lava o lo o malamalamo roundabouts i le tulaga o lona faatinoga ma ona tulafono, ia o le taavale lava e muamua i totonu o le round about, o le taavale na e give way uma i ai itu uma o le round about.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

O lona uiga o so o se taavale lava e oso i totonu o le round about e tatau lava ona vaai give way, o tatou sa muamua give way i le left, o le taimi o le suiga o tatou auala, o lea ua tatou give way ai i le right, ia faatasi ai la ma isi mea na pei ona ou taua, o le taavale lava e muamua i totonu o le round about....o le mea la lena e ala ai ona tupu le sese o isi taavale ma tutupu mai faalavelave, ia e moni lava e tatau lava ona faamlosia pea a tatou polokalame faale-Aoaoga i luga o tatou aualatetele ina ia latou malamalamama i le tulaga pei ona taua.

Ia ou te masalo o le tele o isi a tatou mataupu o lea ua....

**FOFOGA FETALAI:** Ia sei tulai mai le sui usufono mamalu.

**Tofa Lealailepule Rimoni Aiafi:** Lau Afioga i le Fofoga Fetalai, faamolemole lau Afioga. O le vaega taua lea sa laga e se tasi o sui usufono mo Vaimauga Sisifo, Tofa Lenatai Victor Faafoi Tamapua le mea lea e i i i le aega i Magiagi, ua faalua ona tau lavea ai le matou taavale i ina, i le sau lea mai i o i le Kolisi o Samoa ae alu atu lava le taavale i i alu sao loa i uta i Magiagi, ou te talitonu pei lava ua faataga le alu atu o le taavale i i alu loa i uta ae taofi le auala mai o, le taavale sau sao. Po o le sao lea lea ua i ai le Tulafono i le taimi lenei? E tele tele le faaletonu i ina lau Afioga. O le a sei faamalamalama mai la lau Afioga aua o oe lea e te masani i mea o public awareness le taimi foi lea na sui ai le itu auala?

**Tofa TUSA MISI TUPUOLA:** Lau Afioga ma le faaaloalo, o lena ua silasila i ai lau Afioga i le sui usufono mamalu o lena ua fai le hump a le tatou Pulega i luga tonu lava o le mea lea e te saunoa i ai le sui usufono mo Faleata Sisifo, o le agaga o le hump, ia tu, slow down, stop, a o le alu atu lea i lalo, free way all i le mea lena, o lona uiga o la e right of way le alu atu i lalo i luga, ia ona fai ai lea o le tulaga, ae moni lava le tulaga, o la foi ua i ai ma faailoilo lau Afioga i le tulaga o le mataupu lea.

**FOFOGA FETALAI:** Ia.

**Tofa Lealailepule Rimoni Aiafi:** Malie lava lau Afioga, e aoga ona o lo o faafogfa mai i latou e sao le Afioga....o le taavale e alu sao i le aega ma alu sao agai i le Kolisi o Samoa, e le afaina lea, a o le taavale e alu atu afe i uta i Magiagi, o le mea la lena e tatau ona toe i ai se faailoilo, a, e moni o la ua i ai le patupatu ae tatau ona toe faamanatu lelei ma...ona e taua tele le vaega lea.

**FOFOGA FETALAI:** O lea ua maua le finagalo o le sui usufono o lea ua saunoa manino le Afioga i le Taitaifono, e slow down ma stop le sau mai o, and free way and use the brain e alu atu e alu i o agai i Magiagi.

**Ia o lea ua maea, sei tulai mai.**

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai ou te iloa o lea ua aumai manino lava....

**FOFOGA FETALAI:** Ia o le a avatu le avanoa sei tali le Minisita, aua o lea e lua tali a le Malo, a i ai se mea ona tuu atu lea o le avanoa.

Tulai mai lau Afioga i le Minisita.

**Afioga Hon MANUALESAGALALA ENOKATI POSALA:** O lea ua sasaa le uta o le faimea i le tofa i le tatou Palemene nei, aua ia tulaga faatino a le Komiti ma le latou lauliliuina o lenei Lipoti, e pei lava ona manino, o le Lipoti muamua lea a le Pulega mai le 209/2010. Atonu foi o le ala lea ua siisii ai le tai i finagalo ona o mea e tatau ona faaleleia, o mea taua ma mea lelei. Ua manino.....ua faaititia i le 70% ia le tele o patupatu ia sa fai, ma a silasila i le faaopoopoga o le tatou four lane lea e alu atu i Vailoa, ia ua leai se patupatu, ua i ai le Faaiuga a le Kapaneta e le toe faia ia tulaga ia i patupatu ona e i ai foi feteenaiga ma le siosiomaga.

Ae a maitauina i le taimi talu ona uma ona fai le suiga lea le faaopoopoga lea mai Lepea i Vailoa, po o ua fa i le lima faalavelave ua tutupu mai ai i luma i i le pamu lea e i i Vailoa. O le faalavelave mulimuli lava e toalua fanau ia na maliliu ai, ia ua vaavaai i le ogaoga. O le agaga sa faatino ai ia patupatu ia, e tau faamama ai le soona o o taavale ma puipuia ai le soifua ma le ola, o lea foi la ua leai patupatu, ia ua vaavaai foi i tulaga ua faaletonu ma ua aafia ai le soifua. O le faatinoga lena e le Malo o a tatou fuafuaga e vaavaai i fuafuaga e malupuipuia ai tagata uma toe fetuunai foi, ae o le popolega lena o lea e i ai, o lea o le a faaauau le tatou foleni e tau i o i tuaoi o Vaitele ma Saina, o lea e fuafua o le faaiuga o le tausaga ou te iloa ua faatino ua maea, o la o le a maea ona tapena le ata ma faaauau ai loa le....atonu o isi vaega ia o le a silasila i ai ma vaavaai i ai ina ia faamautu ma faalelei ia vaega.

O le tatou kolosi ia o mea uma na, a silasila i ai i le mea lea e i ai le flea maketi i i ma o i le kolosi lea e i luma o le RSA, ia e le atoa se 100mita, o lona uiga foi lele, a toe faaopoopo ua pei ua papanu tele, ae o le soifuaga o la e taumafai i se auala e aoaoina ai tagata feoai ina ia manino e o faalautatai lava i luga o le auala. A o la ua i ai tulafono ma taumafai foi le Malo ina ia tausisia ia vaega, pei o le a avea le solitulafono ma mea o le a taāina ai nisi fuafuaga e tatau ona fai, a o le agaga lava o le Tulafono ia tausisia ma ia malupuipuia ma saogalemu ai.

O le tatou faailoilo, ia ou te iloa o le tasi lea vaega e sili ona faaleaga faailoilo, o i i Faleata Sisifo o gauta o le tele, o le mea foi lena sa avatu ai fautuaga, sei tau vaai ae ua tele ina gagau i lalo ua pipio solo ia faailoilo, a o le agaga o faailoilo, ia o le agaga lava lea o le saogalemu, ae tele ina ese foi le agaga o e e faaleagaina ia mea ma tele ai tupe...o isi mea ua gagau ua faaleaogaina, ia toe tele ai tupe e toe replace ai ia ma faaauau ai le polokalame.

**P.P.2013/2014 Nu.59, Lipoti a le Komiti o Galuega, Felauaiga ma  
Siosiomaga i le P.P.2011/2012 Nu.73, Lipoti Faaletausaga a le Pulega  
o Felauaiga i le Laueelele mo le Tausaga 2009/2010 – Iloiloga**

Ae o isi vaega e pei ona sausaunoa i ai ia sui usufono mamalu, e i ai lava vaega e talafeagai i le auala i le Pulega, a ave i ai, ia e vave lava ona foia le faafitauli, pei o mea ia o kolosi ia e i ai...o tulaga foi lele ia vave ona foia le faafitauli, ou te manatu lava o se mea e tatau ona fesootai, ave le tusi i le....pe fesootai i le Matagaluega ma kopi mai le Minisita, e lelei foi e vaavaai i ai o mea ia e tatau ona fai ia ma taumafai ai e faatino mea ia. Ae pei o vaega laiti lava ia e le tatau ona aumaia i totonu o le tatou Maota nei, a o mea e tatau ona vave ona faatino pe a ogatasi le futia ma le umele i le galalue faatasi o sui usufono mamalu ma mea e tatau ona faalelei.

A o le vaega lea e i ai le give way, o la ua fai i ai ia suesuega, e tilotilo o polokalame sa faatino lava e Niu Sila ma Ausetalia, e lima i le ono tausaga o fai foi a latou suesuega ia o la ua faatino, a o lea foi ua faagasolo ia le vaavaai i ai o e o i ai ia tomai ia, ina ia mafai ona ogatasi ma Niu Sila ma Ausetalia.

O le tulaga i tatou auala lea e i tua i Tiavea, ia o la ua i ai ia le auala foi lele temporary diversions o lo o faaaoga i le taimi nei. Ae o la ua uma ona talia mai e le Faletupe o le Lalolagi ia le faatinoina o le galuega lea, o la foi la e faasolosolo ona o le tele o galuega tetele ia, o la e faatino mai e fesoasoani mai le faletupe, ia o lo o agai foi la i ai ia tapenaga ina ia toe faaleleia ia le auala lea i Tiavea.

E pei o nai mataupu na o lea sa laga mai e sui usufono, a o isi lava vaega uma ia faafetai tele mo fautuaga ua tuuina mai e matimati ai le galuega faatino a le Pulega ina ia faalaulelei ia tulaga uma. Ae lafo maia la outou faatuatuaga o le a agai i ai le tatou Pulega, ma le agaga faaaloalo.

**FOFOGA FETALAI:** Malo. Faafetai saunoa malamalama i lau Afioa i le Minisita - tali faaopoopo. E i ai se mea o oulua silasila i ai se tasi o sui usufono mo le Au Palota Taitoatasie le o... O lea ua...

**Afioa Maualaivao Pat Ah Him:** Ioe lau Afioa i le Fofoga Fetalai i se avanoa lava lea o se mea ou te fia malamalama ai. Faafetai lava. Mo le faasaoina o le taimi e i ai nai fautuaga sa avatu i le tatou Komiti, masalo ua ia latou pea lea vaega ou te le toe oo i ai.

Ae pau lava le mea lea, a faapea e sese lau faalogologo ona faasao mai lea o au, o le saunoaga a le Taitaifono, o lea ma te sosoo ma le Taitaifono o le Komiti lea, ao aga faa-Palemene o la e faafogofa mai Samoa. O le round about pe so o se round about lava, le lapotopoto lea e i Togafuafua sa faapea mai le faamalamalamaga a le Taitaifono e give way le itu taumatau, e sao lea.

**P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2011/2012 Nu.73, Lipoti Faaletausaga a le Pulega o Felauaiga i le Laueelele mo le Tausaga 2009/2010 – Iloiloga**

Ae i ai ma le isi faaupuga lea sa ou faalogo i ai, o le taavale lava e muamua i le lapotopoto lea, pei e faapena le agaga lea, ou te tuliloaina le saogalemu po o fea le sao aua a e agai atu e te alu agai i o e sau mai le auala o le Vaea Street e te agai i Tufuiopa, i le itu taumatau lea i le agai mai i uta i Lalovaea, o lou itu taumatau lena po o le mea e te vaai atu loa ua oo mai le taavale lena e tatau ona e teleteleai po o le sao lea, ao lou itu taumatau lea? E tatau ona e give way. A sese au, faasao mai au pe a sese, ae o lau faalogologo lava lena i ai, leaga o la e faafofoga mai i tei ua fesasiai le atunuu. Ma le faaaloalo lava lau Afioga i le Fofoga Fetalai.

**FOFOGA FETALAI:** O le a tulai mai le Sui Taitaifono e fesoasoani.

**Afioga AFOAFOUVALE JOHN MOORS (Palauli):** Faafetai mo le avanoa. Ia sei fai se malologa a le Taitaifono o le matou Komiti. O le tali i se tasi o sui usufono mo le Au Palota Taitoatasi, Afioga Maualaivao Pat Ah Him, e faigofie lava, e eseese failoilo ma faailoga ma tulaga o le round about ma le four way stop, pei o le mea lena o lea ua agai i ai, o le four way stop o le taavale e muamua atu, tu laia ona toe alu lea, ao le round about e tuu lava le avanoa i le taavale o lo o sau i le itu taumatau. Ma lou faaaloalo lava.

**FOFOGA FETALAI:** Malo faafetai fesoasoani mai. Tulai mai le sui usufono mo Faasaleleaga Nu 4.

**Afioga Peseta Vaifou Tevaga:** Lau Afioga i le Fofoga Fetalai, ua ou tulai atu ona e faigata leaga o la e faafogafoga lou itumalo ona o lea na molimauna i le saunoaga foi a nisi o sui usufono mamalu ia se tala lelei e uiga i patupatu ia e i le motu tele i Salafai. O lea foi ua saunoa le Taitaifono i le matagofie o ia patupatu, ae paga lea o lea e le o manino lelei i le Palemene po o ai na faua nei patupatu. O lea lau Afioga i le Fofoga Fetalai, e momoli atu ai le faafetai a lenei itumalo ona o galuega na faia e le sui usufono o lenei itumalo, ae lei ulufale mai i totonu o le Palemene. Ma lou faaaloalo lava.

**FOFOGA FETALAI:** Tulai mai lau Afioga i le Minisita.....

**Afioga Hon MANUALESAGALALA ENOKATI POSALA:** Lau Afioga i le Fofoga Fetalai, ou te iloa o patupatu lava e le talafeagai ona toe i ai i Savaii, o lea o le a aveesea ma tua i Lufilufi o lea o le a agai i ai le Pulega e aveese pe a le talafeagai.

*Na faamaonia le Lipoti.*

**P.P.2013/2014 Nu.62, Lipoti a le Komiti o Aoga, Sainisi, Fesootaiga  
ma Faamatalaga Tekonolosi i le P.P.2011/2012 Nu.34, Lipoti  
Faaleausaga a le Faalapotopotoga o Suesuega Faasaienisi  
a Samoa mo le Tausaga 2009/2010 - Illoiloga**

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina mai i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

Ia, ua fai si umi o tatou soalaupule le Lipoti na uma atu nei ona o le tulaga o le tau faamaninoina ae pei lava ona taumafai atu le Fofoga Fetalai i le taimi ua sola, o le agaga lava ia ia faasolo le tatou galuega. O lea la ua maitau atu ua tatau ona sui se isi faiga tatou te agai i ai, ona o lea e faalauaitele a outou lauga o lea tou te lauga i le 2008, 2009 a o lea ua oo le tatou galuega i le 2014. Ua manatu ai ma talosagaina le Failautusi o le Fono Aoao ma le Sui Failautusi o le a tuufaatasi tatou Lipoti. O Lipoti lava i lalo o le Taitaifono pe tasi, lua, tolu, fa, o le a tuufaatasi ae tolaulau i le taimi e tasi, ona talafeauga ai lea o a outou felafolafoaiga e fai faatasi ai outou manatu i le taimi lenei ma le taimi ua sola ma le mea lea o le a tulai mai. O le agaga lena, o lo o maitauina o Lipoti o lo o agai mai, o le:-

**P.P.2013/2014 NU.62, LIPOTI A LE KOMITI O AOGA, SAIENISI,  
FESOOFTAIGA MA FAAMATALAGA TEKONOLOSI I LE  
P.P.2011/2012 NU.34, LIPOTI FAALEAUSAGA A LE  
FAALAPOTOPOTOGA O SUESUEGA FAASAIENISI A SAMOA  
MO LE TAUSAGA 2009/2010 - ILOILOGA**

**FOFOGA FETALA:** Ou te valaau atu i lau Afioga i le Taitaifono e te tulai mai, tolaulau uma au Saililiiga, Fautuaga ma lugafono i Lipoti nei e tolu, leaga e tagatasi ina nei tatou oo atu foi i le Lipoti mulimuli ane ona faigofie foi lea ona tali atu le tali atu le Taitaifono aemaise o le Minisita e ala i nei Lipoti e faatelevave laitiiti ai le tatou Fono ma ia manino ma malamalama, leaga o lea ua tali i le tulaga faalauaitele ma saunoa Afioga i sui usufono i talosaga faalauaitele, ma faigofie ai le tatou galuega.

Tulai mai lau Afioga i le Taitaifono.

**Tofa LENATAI VICTOR FAAFOI TAMAPUA:** Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai SAILILIGA, FAUTUAGA ma IUGAFONO.*

*Faaluaina e le sui usufono mo le Vaa o Fonoti, sui usufono mo Palauli ma le sui usufono mo Sagaga le Falefa.*

**P.P.2013/2014 Nu.62, Lipoti a le Komiti o Aoga, Sainisi, Fesootaiga  
ma Faamatalaga Tekonolosi i le P.P.2011/2012 Nu.34, Lipoti  
Faaletausaga a le Faalapotopotoga o Suesuega Faasaienisi a  
Samoa mo le Tausaga 2009/2010 - Iloiloga**

**Tofa LENATAI VICTOR FAAFOI TAMAPUA: Faafetai i lau Afioga.**

**“FAUTUAGA:**

I le maea ai o ana iloiloga, e fautuaina e le Komiti le Malo ina ia:-

1. Vave faalauiroa Faaiuga o so o se Suesuega Faasaienisi e faatinoina mo le silafia e le atunuu lautele aemaise o le Aufaipisinisi, aua o i latou tonu ia o lo o i ai le talitonuga mo le gafataulimaina o le faaaogaina o ia fuafuaga, e gaosia ai ni oloa i le lumanai. E tatau foi ona silasila le Faalapotopotoga i le galulue faapaaga ai ma ni Pisinisi Tumaoti mo le tuuina atu i ai o le tulaga tau maketi.
2. Silasila i ni aiaiga talafeagai mo le faatulagaina o ni totogi o ni inisiua tau soifua o le Aufaigaluega aemaise ia i latou o faafoeina suesuega faasaienisi, ona o lamatiaga i o latou soifua i le faatinoina o ia suesuega.
3. Tatau ona faamalosia le galulue faapaaga o le Faalapotopotoga ma le Pulega o le Suavai ma le Matagaluega o le Soifua Maloloina i le suesueina o suavai taumafa ma so o se ituaiga taumafa tuuapa o lo o auina mai i totonu o le atunuu.
4. Tuuina atu le lagolago mo le faatauina mai o se afi eletise mo le Faalapotopotoga, ona o le tele o masini o lo o faaaogaina i suesuega faasaienisi, e manaomia le faaaoga i totonu o le 24 itula.

**IUGAFONO:**

I le maea ai o iloiloga a le Komiti na faaiugafonoina ai e fautuaina le Fono Aoao:

**Ina ia faamaonia le P.P.2011/2012 Nu.34, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faalelupu na faaiuina aso 30 Iuni 2010.”**

**P.P.2013/2014 NU.64, LIPOTI A LE KOMITI O AOGA, SAIENISI,  
FESOOATAIGA MA FAAMATALAGA TEKONOLOSI I LE  
P.P.2011/2012 NU.56, FUAFUAGA AUTASI A LE  
FAALAPOTOPOTOGA O SUESUEGA FAASAIENISI A  
SAMOA MO LE VAITAIMI 2012-2014 - ILOILOGA**

**“FAUTUAGA:**

I le maea ai o ana iloiloga, e fautuaina e le Komiti le Malo ina ia:-

1. Faamalosia le galulue faapaaga o le Faalapotopotoga ma le Matagaluega o Faatoaga ma Faigafaiva, ina ia mautinoa le maua pea o alaoa (raw materials) moomia e pei o ulu, avoka, manioka ma isi, mo suesuega faasaienisi a le Faalapotopotoga.
2. Uunaia pea le faatinoina o Polokalame Faalauiola e faalauiola ai taunuuga o isi suesuega faasaienisi ua maea ona faatinoina, mo le silafia e le Vaega Tumaoti po o tagata taitoatasi e gafatia le faatautaia o ni pisinisi e faaaogaina ai Faaiuga o ia suesuega.\
3. Fautuaina le Faalapotopotoga ina ia galulue faatasi ma le Sosaiete o Taulasea Samoa i a latou suesuega o lo o faagaso lo mo laau Samoa e i ai le mafai gafatia mo le atiaeina o vailaau gaosia mo le togafitia o gasegase, ma amanaia ai ia vailaau faalenatura (Samoa) e tusa o aiaiga faamaonia o tulaga aloaia o agavaa faava o Malo o suesuega faasaienisi.
4. Fautuaina le Faalapotopotoga ina ia uunaia malosi ana auaunaga faa-Faufautua ma suesuega faalotoifale i le galulue faatasi ai ma isi Matagaluega ma Faalapotopotoga Tumaoti a le Malo po o le Vaega Tumaoti, e fesoasoani ai i ana tupe maua e lagolago ai le faatupeina o ana suesuega o lo o faaaauau pea.

**IUGAFONO:**

I le maea ai o iloiloga a le Komiti na faaiugafonoina ai e fautuaina le Fono Aoao:

**Ina ia faamaonia le P.P.2011/2012 Nu.56, Fuafuaga Autasi a le Faalapotopotoga o Suesuega Faasaienisi a Samoa mo le Vaitaimi 2012-2014.”**

**P.P.2013/2014 NU.123, LIPOTI A LE KOMITI O MATAUPU TAU  
 AOGA, SAIENISI, FESOOFTAIGA MA FAAMATALAGA  
 TEKONOLOSI i LE P.P.2012/2013 NU.11 MA LE P.P.2012/2013  
 NU.39, LIPOTI FAALETAUSAGA A LE FAALAPOTOPOTOGA O  
 SUESUEGA FAASAIENISI A SAMOA MO LE TAUSAGA  
 FAALETUPE 2010/2011 MA LE TAUSAGA FAALETUPE  
 2011/2012 - ILOILOGA**

**“FAUTUAGA:**

I le maea ai o ana iloiloga, e fautuaina e le Komiti le Malo ina ia:

1. Faatautaia ni polokalame faalauiloa a le Faalapotopotoga e faailoa atu ai i le atunu lautele nisi o oloa fou ua mafai ona gaosia, ma faailoa atu foi ituaiga ala'oa faalenatura eseese o lo o moomia ai le lagolago a le atunu i le galueaina, ina ia mafai ai pea ona maua i totonu o Samoa ala'oa mo le gaosia o oloa eseese, mo faamemoega o oloa auina atu i fafo, aemaise o le faaitiitia ai o oloa taugata auina mai fafo.
2. Faamalosia le galulue faapaaga o le Faalapotopotoga mo le Pulega o le Suavai, Matagaluega o le Soifua Maloloina, Matagaluega o Faatoaga ma Faigafaiva i le faaauau ai o galuega suesue faasaienisi i le tulaga o le mataituina o le suavai mama ma taumafa maloloina mo le atunu lautele.
3. Silasila le Faalapotopotoga i nisi avanoa talafeagai e ono mafai ona maua ai ni Paaga faava o Malo i le tulaga i tomai o suesuega faapitoa ma suesuega faasaienisi mo le faalauteleina o le tomai i le Faalapotopooga mo le faaleleia o ana auaunaga mo le manuia o le atunu.
4. Faamalosia le uunaia malosi o le Faalapotopotoga mo le siitia o ana auaunaga e ala atu i Fonotaga faatino i le atunu ma le Pasefika i vaega tau suesuega faapitoa ma suesuega faasaienisi. O se tulaga e le gata i le siitia ai o lana auaunaga ae e fesoasoani foi i le itu tau tupe mo le faatinoina o ana gafataulima.
5. Silasila le Faalapotopotoga i le faaleleia o le faatinoina o ana auaunaga faafaufautua o lo o faipaaga ai ma isi Matagaluega ma Faalapotopotoga a le Malo ma Vaega Tumaoti, ina ia siitia ai ana tupe maua e fesoasoani ai i ana galuega faatino ma lagolago ai foi i fesoasoani a le Malo e ala i le vaegatupe faatatauina i tausaga faaletupe taitasi.

**IUGAFONO:**

I le maea ai o iloiloga a le Komiti na faaiugafonoina ai e fautuaina le Fono Aoao:

**P.P.2013/2014 Nu.123, Lipoti a le Komiti o Mataupu Tau Aoga, Saienisi, Fesootaiga ma Faamatalaga Tekonolosi i le P.P.2012/2013 Nu.11 ma le P.P.2012/2013 Nu.39, Lipoti Faaleausaga a le Faalapotopotoga o Suesuega Faasaienisi a Samoa mo le Tausaga Faaletupe 2010/2011 ma le tausaga faaletupe 2011/2012 - Iloiloga**

Ina ia faamaonia le P.P.2011/2012 Nu.11, Lipoti Faaleausaga a le Faalapotopotoga o Suesuega Faasaienisi a Samoa mo le Tausaga Faaletupe 2010-2011, ma le P.P.2013/2014 Nu.39, Lipoti Faaleausaga a le Faalapotopotoga o Suesuega Faasaienisi a Samoa mo le Tausaga Faaletupe 2011-2012.”

**Faafetai.**

**FOFOGA FETALAI:** Malo faafetai saunoa i lau Afioga i le Taitaifono, ma e manatu o le tulaga lena o lea ua faamanino atu i le tatou Maota. O lea ua outou faafofoga, e tasi lava le Matagaluega ma le Komiti ma le Taitaifono, a ua tauaofai uma i lalo Iloiloga ma Saililiiga ma latou Lipoti. Aua o lenei tuufaatasiga, e tasi lava le auga na auga i ai, ona o le mafuaaga e eseese tausaga. A ua ou manatu ma le Failautusi ma le Sui Failautusi, ina ia faapuupuu le taimi o le agai o tuleiga ma saunoaga, tasi le taimi tou te saunoa ai, e aofia ai le taimi ua sola ma le taimi lenei ina ia matua atagia ai le taimi aua nei tatou toe tautalagia a ua tautuaupega ia outou saunoa, a o lea ua manino le folasaga a le Taitaifono e ala i le mea na tupu, ma le mea ua tupu ma le mea o le a tupu, ina ia faataoto ai i lagatonu taualumaga. Ma o le alafua lena o le a tatou faasolo ai i le aso a taeao.

E momoli atu le agaga faafetai tele i le paia ma le mamalu o le tatou Maota, ona e talitonu o lea ua tatou taunuu tonu i le tatou taimi malolo. E talitonu foi o le a le faalava le amoa i tuleiga ma saunoaga, ona e taua finagalo ma manatu ma lagona o lo o agai mai i nisi o a tatou Lipoti ua tuanai atu. E fai foi o le naunau atu o le Nofoa e tulitatao lo tatou taimi, ae le mafai ona tulitataoinga ni mataupu ogaoga ma ni mataupu taua o lo o agai mai i ai la outou fautuaga i Afioga i Minisita aemaise foi o Taitaifono o Komiti. O le agaga lena o lea e fai lava ma tuu atu le avanoa, ae tuu atu pea foi le talosaga ma le fautuaga ia outou alofagia e 70+ tatou Lipoti nei e tau tuli. A outou faafofoga foi sui usufono mamalu ua uma ona saunoa le isi sui usufono mamalu i le mataupu lava e tasi, ia faia lena ma sui. Ua matua tumu le Maota i le faafetai, tuu ifo lava o le faafetai, o le faamanu ma mea uma faapena. Ae le mafai ona popole ai fua, leaga o la e faafofoga mai itumalo e tatau pea ona logona outou suafa, ae le uma ai Tulafono. O lea foi ua tatou vaavaai ma tilotilo i tulaga o galuega lelei na faatino e le Matagaluega ma mea uma, e le faigofie. O le Matagaluega lenei ua ave i ai le faamamafa a le tatou Malo, e le gata i le saogalemu, a o le vaavaaia o mea ia e vevesi i aso uma. O le malaga a le maliu ma le oti o luga o alatetele. Ae momoli le agaga faafetai i le Matagaluega, le afioga i le Pule Sili aemaise le aufaigaluega atoa i le tauavameaina o la outou galuega.

P.P.2013/2014 Nu.123, Lipoti a le Komiti o Mataupu Tau Aoga, Saienisi,  
 Fesootaiga ma Faamatalaga Tekonolosi i le P.P.2012/2013 Nu.11 ma le  
 P.P.2012/2013 Nu.39, Lipoti Faaletausaga a le Faalapotopotoga o  
 Suesuega Faasaienisi a Samoa mo le Tausaga Faaletupe 2010/2011  
 ma le tausaga faaletupe 2011/2012 - Iloiloga

Faafetai foi i le Afioga i le Minisita e tusa ai ma le taumafai e talitali mai le oo atu o tuleiga ma saunoaga. O le agaga lava o le tatou Maota, o le tatou ato e fevailiai.

Ona ua tatou taunu mai, o lo o i ai nisi o fesuaiga o le tatou polokalame. E i ai le faamoemoe sa faapea e fetuunai le tatou Fono tatou te aulia le Aso Faraile, ae ua faailoa mai ua oo mai tusi faanoii, e toatolu Minisita o le a toesea le tatou Maota i le aso a taeao ona o nisi o fuafuaga faale-Malo ma fuafuaga le maalofia ma malaga i fafo. O lo o tele foi ma anoanoai tuatuanoa o le Afioga i le Sui Palemia ona o galuega uma a le Afioga i le Palemia, ua nafa nei ma le Sui Palemia mo le faasolo atu i le faaiuga o le vайасо. Ua ou manatu ai, o le a fai se tulaga o le tatou Fonotaga a taeao ona o le tulaga i le tele ma le anoanoai o nisi o mea sa tatou le maitauina ua tulai mai. Sa faataatia foi le polokalame ona o tulaga o tatou Tulafono Tumau. Ona o le aso a taeao ua outou silafia, o le polokalame lava ia a oo i le Aso Tofi, o aso o tuufesili a le Itu Agai o lo o tuuina mai i le tatou Maota. Ma o le a fai le filifiliga a le Matagaluega i le afiafi nei, o le a ou le tuuina atu se tali mo le taimi nei, o le mea aupito sili ona faataatia e agatonu ai le tatou faamoemoe ma le tatou polokalame lea ua fai, o le tali lena e tuu atu mulimuli e le Fofoga Fetalai ma faailoa ai le tatou polokalame a taeao. Ae vaatele i o outou finagalo, e le uma le faiaso a le Alii. O le agaga ma le faamoemoe o lea ua tuu mai lo outou finagalo e ala i fesili ia ua outou manatu ai, ou te tilotilo atu, o fesili uma lava ua uma ona tali. E leai se mea o le a outou tulituliaupu ai o le maketi lea tou te saunoa i ai o la e ua alu i luga pou, toe lava o le ato le mea la e totoe, ae onosai. E pei lava ona fai atu, o lo o tele ma anoanoai a tatou galuega o lo o faagaso mai, e le uma ai Aso Tofi o le vайасо na fau e le Alii, e oo mai foi i se isi taimi ona faatulaga lea, ae le faapea o le tali lea ou te avatua, o le tali lena ua fai ai le faaiuga i le aso. O le a tuu atu i aao lautetele o le Failautusi o le Fono ma le Sui Failautusi, tele pe itiiti, o le a tatou felogonai pe a tali le tatou sua i le Tofilau Eti Alesana.

Ae le i faaiuina le tatou Fono, ou te tuuina atu le avanoa i le Afioga i le.....

**Afioga Hon Palusalue Faapo II:** Lau Afioga i le Fofoga Fetalai ma le faaaloalo, e leai ua ou tei i lau faasilasilaga, ae o lo o manino i lalo o le Tulafono Tumau le matou aiatatau e faamalamalama ai nisi o mea pei ona matou fesiligia. O lea la e tatalo atu ai i lau Afioga, sei tatou oo foi i se tulaga fou, ona e taua tele, o le Aso Tofi muamua lea faatoa oo i ai le tatou Fono, e tele matou fesili na avatu muamua ae le iloa po o fea ua oo i ai. A o le Aso Tofi muamua lea, e tatalo atu i lau Afioga, sei tatou usitaia le Tulafono Tumau. Ma lou faaaloalo lava.

P.P.2013/2014 Nu.123, Lipoti a le Komiti o Mataupu Tau Aoga, Saienisi,  
Fesootaiga ma Faamatalaga Tekonolosi i le P.P.2012/2013 Nu.11 ma le

P.P.2012/2013 Nu.39, Lipoti Faaletausaga a le Faalapotopotoga o  
Suesuega Faasaienisi a Samoa mo le Tausaga Faaletupe 2010/2011  
ma le tausaga faaletupe 2011/2012 - Iloiloga

**FOFOGA FETALAI:** Lau Afioga i le Taitai o le Itu Agai, sa ou faapea e te le toe tei. O le tulaga lea ua uma ona ou fai atu, o le Aso Tofi muamua e le o se Aso Tofi mulimuli foi lea, ae lafo maia lau faatuatuaga. O le mea lea o lou saunoa i lau aiatatau, e i ai foi le aiatatau a le Speaker. A ou faaaogaina nei lau aiatatau, e leai lava sau aiatatau e tulai, ae ava atu tele. O lea lava e – I do respect Honourable, ae ia fai fuafua mai foi o lea e tau faatonu folau le tatou Fono. O taimi uma lava o lea lava e te matua tafili saunoa lava i lau aiatatau. E leai lava sau mea o faia, o lea na faasao nei foi oe i le aoauli a o lea lava e... E ui i lea, tatou faatea ia fulauvi mo le nuu, ae tatalo atu i lau Afioga i le Tuiatua Faanofonofo, sei tulai mai e fai se tatou tatalo faaiu ona uma ai lea o le tatou Fono mo lenei aso.

*Na motusia Felafolafoaiga ina ua tolopo Tauualumaga i le itula e 1:07 i le aoauli.*